




Kwin Elizabeth i kam lukluk raun long PNG.




Michael Somare i kam bek long gavman.



Iambakey Okuk i lus long ileksen.




Sir Julius Chan i bin opim bikipela suga faktori long Ramu long 1982.




Ted Diro nupela lida bilong Oposisen na Nesenel Pati.

Poto Ripot Bilong 1982



Ol trabelman long Mosbi i givim Nu Yia presen i go long ol dispela haus long Tokarara, Mosbi. Ol i kamautim ol dispela draipela paip bilong toilet.
 Poto - Eva Uwedo



Opis bilong Air Niugini long Lae ples balus i paia long Sande 2 Janueri.

Poto - Sape Metta

Published by News Media at section 105 lot 11 Gardens and printed by News Media at Port Moresby. Registered at the G.P.O. Port Moresby as a qualified publication.

24 Pipel Kisim Namba Long Kwin

SKELIM GUT WOK

Yia 1983 i stat nau. Na long PNG ol pipel i wet long lukm promis bilong Somare gavman i karim kaikai. Gavman bilong Somare i winim 6-pela mun pinis. Na insait long dispela 6-pela mun planti senis i bin kamap long program bilong ol long ol wok insait long kantri.

PNG na ol arapela kantri long wok i wok long painim hevi long mani. Na dispela 6-pela mun gavman bilong Somare kam insait long gavman, ol i painimaut tu olsem ol promis ol i bin mekim long taim bilong ileksen i no inap long karim kaikai hariap.

Wok bilong gavman i no isi wok. Sampela samting ol i mekim bai bringim belpen na kros. Na tu bai i daunim poin bilong gavman long ai bilong ol pipel.

Yumi hop ol bikpela wok bilong kantri i ran gut long dispela yia. Lukluk i go bek long ol asua bilong bipo na skelim gut ol nupela wok. Em bai yumi ken abrusim ol hevi na wok gut.

Hepi Nu Yia long yupela olgeta.

LONG 1983 Nu Yia i gat 19 man na 5-pela meri i kisim namba i kam long Kwin. Gavana Jeneral, Sir Tore Lokoloko i bin tokaut long nem bilong ol dispela lain manmeri long 30, Desemba, 1982.

Kt. • Sir Bruce Jephcott, CBE. Em i kisim namba ol i kolim Knight Bachelor. Pastaim em i minista na memba bilong Madang long palaman. Em kisim dispela mak long wok bilong em long politik na komyniti.

• Sir Ebia Olewale, namba tu Praim Minista long olpela Somare gavman. Dispela namba i go long em long wok bilong em long politik na gavman.

C.M.C.

• Galen Lang, Namba tu Primia

bilong Madang provinsal gavman. Dispela namba i go long wok bilong em long provinsal na lokal gavman.

• CBE, Paul Bengo, Provinsal Seketeri, Is Sepik Provins, long wok bilong em long politik na gavman.

• Suinavi Otio, memba bilong Lufa long palamen, long wok bilong em long komyniti na palamen.

O.B.E

• Daniel Joseph Leahy, Wapela long ol namba wan waitman long kamap long Hailans. Namba wan man long statim wok bilong planim kopi na long wok bilong developim Westen Hailans.

• Ramon, Richard Thurecht, Jeneral Menesa bilong PNG Printing Kampani. Em i kisim dispela namba long wok bilong em long turis, komes na gavman. Em i holim planti bikpela wok insait long ol oganai-

sesen i stap insait long wok bilong developim kantri.

• John Tovuia, i kam long Matupit, Rabaul. Em i wanpela bikman bilong ples na komyniti. Namba wan presiden bilong Rabaul Lokal Gavman Kaunsil na i bin memba bilong Lans Taital Komisn inap longpela taim tru. Em i kisim namba long wok bilong em long komyniti.

• Bernard Vogae, Primia bilong Wes Nu Briten Provins, long wok bilong enlong provinsal na lokal gavman.

M.B.E.

• Pater Brian Barnes, O.F.M., husat i wanpela Pater bilong Katolik Sios. Em i kisim dispela mak long gutpela wok em i mekim insait long Plis Fos.

• Misis Immaculata Kereku bilong Rabaul. Em i nesenel presiden bilong Katolik Wi-

men's Asosiesen. Pastaim em yet i bin statim dispela Asosiesen. Em i wanpela metron bilong Nonga Bes Hospital bipo. Em i kisim dispela mak long gutpela wok em i mekim insait long komyniti.

• James Koibo, wanpela Edministretiv Seketeri long Not Solomons Provins i kisim dispela namba long gutpela wok em i mekim long pablik sevis.

• Mis Tapora Lokoloko bilong Mosbi i wanpela Sief Tisa bilong ol Nes long Helt Dipatmen. Em i kisim dispela namba long gutpela sevis em i givim long wok bilong ol nes.

• Misis Salitia Muga. Em i winim 8-pela gol medal, wanpela silva medal na tupela brons medal long Saut Pasifik gem. Em i bin winim planti bikpela resis insait long PNG. Em i kisim dispela mak, long wane m em i givim gutpela sevis i go long spot insait long PNG.

• Misis Rosemary Munaga bilong Arawa. Em i Sista bilong haus sik na em tu i wanpela opisa bilong Ret Kros inap long 10-pela yia nau. Em i mekim gutpela wok long helpim ol sikman na meri.

• Mista David Oiyey, Deputi Suprintenden long Buimo haus kalabus long Lae i kisim dispela mak long gutpela wok o sevis em i mekim long Korektiv Institutun Sevis.

• Misis Veitu Rumeri bilong Mosbi. Em i kepten na kosa bilong Demons Netbal tim long 1967 yet i kam inap long dispela yia, 1983. Em i wanpela memba bilong Spots Et Faundesen na Nesenel Spots Kaunsil. Em i mekim gutpela wok long helpim spot insait long PNG.

B.E.M

• Senia Konstabel Gene Garima bilong Bundi Plis Kem long Madang Provins i kisim dispela medal long gutpela sevis long Plis Fos.

i go moa long pes 7

4-pela Nupela Opis Bilong NPF

NESENEL Providen Fan (NPF) bai opim 4-pela opis long Rabaul, Lae, Maun Hagen na Madang long 1983.

Namba wan opis bilong Nesenel Providen Fan bai ol i opim long Rabaul long mun Janueri 1983. Bihain long tripela mun i pinis bai ol i statim Lae opis na bihain long tripela mun bai ol i opim opis long Hagen. Olsem tasol i go inap ol i pinisim olgeta 4-pela opis.

Rabaul opis bai i lukautim Niugini Ailan Rijen, em Is Nu Briten, Not Solomons, Wes Nu Briten, Manus na Nu Ailan. Lae opis

bai op long mun Epril. Opis long Lae bai i bosim Morobe Provins tasol. Long wanem Morobe Provins i gat planti ol bikpela bisnis na ol praivet kampani. Olsem na opis long Lae i, no inap lukautim olgeta Niugini inlan eria. Opis long Maun Hagen bai lukautim Hailans Rijen.

Madang opis yet bai lukautim Madang na Is na Wes Sepik Provins. Dispela ol opis bai ol i pinis tru long 1987.

Ezekiel Brown, dairekta bilong Nesenel Providen Fan i tok, "Mipela i redim K35, 000 pinis (35 tausen kina) long kirapim ol dispela 4-pela opis long 1983. Gavman i no bin helpim mipela long

sampela mani. Nogat tru.

Mipela bai yusim K35,000 (35 tausen kina) i kam long wok edimnistresen, mipela i save mekim. Mipela i laik statim opis hariap tasol long 1983 bikos bisnis wok bilong mipela i kamap strong na bikpela hariap tru. Long 1981 taim mipela i statim dispela nupela opis long Mosbi, mipela bin gat 27,000 memba olgeta. Na long 1982 namba i go antap tru long 55,600.

Ol memba i bilong olgeta hap bilong PNG husat i wok long bikpela bisnis kampani. Namba ya i bikpela tumas na 1983 bai mipela i gat planti moa memba i kam joinim mipela. Em as tru mipela i laik kirapim opis hariap long ol

bikpela taun bilong wan wan rijen olsem bai i ken helpim olgeta kampani insait long kantri.

Opis long Mosbi i no inap moa long lukautim mani bilong olgeta praivet kampani na bisnis grup insait long PNG. Mipela i kirapim ol arapela 4-pela opis moa bai Mosbi opis yet i ken stap olsem het opis na lukautim Papua Rijen tasol. Na 4-pela arapela i stap na wok klostu wantaim ol bisnis grup long Niugini.

Arapela samting tu em nau i gat 47 wok manmeri tasol na dispela i no inap. Tasol taim mipela kirapim ol opis ya, bai mipela mas kisim sampela moa wokman."



INVESTMENT CORPORATION OF PAPUA NEW GUINEA

SEA PRAIS DISEMBA 1982
(Prais bilong sea wantaim fi mani)

50 sea	K54.00
100 sea	K108.00
150 sea	K162.00
200 sea	K216.00
250 sea	K270.00
300 sea	K324.00

Wok bilong salim na baim bek ol sea bilong dispela fan i bihainim tasol ol toktok i stap insait long Prospektus Prais bilong wan wan sea long Novemba em i K0.96. Husat i laik save long prais bilong baim bek ol sea i ken rait i kam na askim mipela.

Plis salim wanpela Prospektus buk bilong yupela i kam long me.
TO: INVESMEN KOPRESEN, P.O. BOX 155, POT MOSBI.

NEM
ADRES

WANTOK NIUSPEPA

Nius i kamap 52 taim long yia nau.

Opis bilong Edita na Edvetaising long P.N.G.
P.O. Box 1982, Borko
Telepon . 252500 Teleks. NE 22213
Edvetaising - Ph .25 2304

LAE

Telepon - 42 2516

PE BILONG WANPELA YIA, 52 NIUSPEPA

Ples	Air	Surface
Port Moresby	-	K 13.52
Rest of PNG	K 26.00	K 26.00
Australia & Solomons Is	AS 65.70	AS 44.42
NZ & Pacific Island	US\$ 85.80	US\$50.00
America & Europe	US\$132.60	US\$66.30

TAMBU TORO

KOLE, WANPELA
PREN. BILONG EM
DATIM. EM LONG GO
DISKO. NA TORO
TASOL
ISTAP
LONG HAUS.



OL RASKAL TING
NOGAT MAN I STAP
INSAIT LONG HAUS.



TORO HARIMA NOIS NA EM PRET LONG
KAM AUSAIT NA
SINGAUT
STRONG.



Tin Pis Faktori Long

Manus

MANUS Provins i gat bikpela sans liklik long Is Nu Briten Provins fong kisim wanpela faktori bilong wokim tin pis long provins bilong ol, long samting olsem 5-pela yia bihain.

Long olgeta provins long PNG ailan, Manus na Is Nu Briten Provins i wok long toktok strong tru long nesenel gavman na Dipatmen bilong Praimeri Industri long putim dispela pis faktori long provins bilong ol.

Is Nu Briten Provins i mekim strongpela tok save i go long Dipatmen bilong Praimeri Industri long Janueri 2, olsem Is Nu Briten i gat gutpela ples balus, na em inap long helpim faktori i rangut. Na tu i gat ol samting bilong pis faktori i stap pinis em kampani bilong Amerika, Starkist, i redim taim ol tu i laik wokim wanpela pis faktori i no long taim i go pinis.

Tasol tingting bilong Mista Dennis Young, Minista bilong Praimeri Industri, em i no bilong yusim ol dispela ol samting

bilong Starkist kampani. Em i tok, "Mipela i tingting long bringim developmen i go long ol provins we i no gat bikpela developmen i kamap long en."

Mista Young i lukluk moa long Manus Provins taim em i wok long toktok long developmen. Em i tok olsem Manus Provins em i wanpela provins we i no gat ol bikpela developmen i go het long en. Em i tok olsem long lukluk bilong nesenel gavman, ol i tingting long putim pis faktori long Manus Provins.

Em i tok, "Tasol olgeta samting i stap long han bilong Italtapesca kampani bilong Itali. Ol yet bai mekim wanpela stadi long wanem hap tru ol i ting em bai gutpela long wokim dispela pis faktori. Na ol yet i toktok pinis long putim bikpela mani long wokim dispela pis faktori."

Italtapesca kampani bai i kamap long PNG long stat bilong mun Februeri bilong dispela yia tasol long stat mekim wok bilong ol long lukluk raun long ol ailan provins, long painim gutpela hap bilong kamapim fak-

tori bilong mekim tinpis.

Tasol wok bilong ol bai i no ken stat inap 3-pela bikpela bot bilong painim pis i kamap long PNG. Dispela tripela bot, Italtapesca yet bai baim o kisim i kam. Hevi bilong wanpela bot em olsem 350 ton.

Mista Young i tok olsem, bihain long ol bot i kamap, ol bai wetim Italtapesca long painim ples bilong putim tupela bikpela haus bokis ais bilong putim ol pis em ol i redim nau long salim long Yurop.

Italtapesca yet bai bringim ol dispela pis i go long pis maket long Yurop long salim.

Mista Young i tok olsem, 25 pesen bilong ol pis Italtapesca i painim long solwara bilong PNG, bai kampani bilong ol yet i baim.

Dispela pis faktori, em i samting gavman i tingting long kamapim long 4-pela, o 5-pela yia bihain long 1983. Na em bai i kamap tru, sapos olgeta samting i wok orait tasol, "na sapos Italtapesca inap long putim mani bilong ol long we maus bilong ol i stap long en." Mista Young i tok.

Stapim Suga I Kam Long Ovasis

NESENEL gavman bai i stapim olgeta kampani na industri insait long Papua Niugini long odaim suga i kam long ol ovasis kantri olsem Australia o Nu Silan, long Februeri 1, 1983.

Long Madang na Lae, gavman i traim long stapim pinis ol industri long odarim suga i kam long ovasis. Dispela long wanem nau yumi PNG i gat pinis, Ramu Suga kampani long saplain suga long kantri.

Namba tu, Foren Afeas Minista, Mista Bais i tokaut olsem, "Gavman i toktok long stapim ol industri long kisim suga i kam long ovasis. Bikos long Me 1983, taim Ramu kampani i kamautim namba wan lain suga long wokim bai ol i wokim planti tru long inapim olgeta hap bilong kantri.

Olsem na gavman i bin tok klia long Ramu Suga Kampani olsem,

ol bai helpim kampani long mekim bai olgeta pipel i ken baim suga bilong kantri yet. Long wanem gavman yet tu i gat nem long Ramu Suga Kampani.

Tasol namba tri menesa bilong Stimsip Kampani, Mista Morris i tok, "Dispela lo long stapim suga i kam long arapela kantri i no inap bagarapim wok bilong kampani o bringim hevi long mipela. Tasol mi ting ol pipel bai i painim hat tru, long wanem prais bilong suga ol i wokim long Ramu, bai i go antap long suga, ol i save baim i kam long ovasis.

"Mi tok dispela, bikos tripela mun i go piis, sampela ol lain bilong kampani i mekim wanpela stadi long dipela toktok bilong gavman i laik stapim suga i kam long ovasis. Na ol i painiamut, olsem, ol manmeri long kantri bai i kisim taim, bikos prais bilong Ramu suga bai i go antap moa long suga i kam long ovasis.

Eksekutyutiv Opisa bilong Minista bilong Praimeri Industri, Leith Anderson i tok, "Ramu Suga i gat bikpela suga gaden tru inap long pulapim bel bilong olgeta pipel long Papua Niugini. Na tu taim olgeta masin i kam pinis bai kampani i wokim planti moa suga na salim sampela i go ovasis.

Tasol bikos Ramu i no gat masin bilong wokim spesel suga bilong ol sof dring,

Gavman i givim laisens i go long Ramu Suga kampani tasol long odarim ol CSR suga i kam long Australia na Nu Silan long salim long ol sof dring kampani.

Ramu Suga Kampani bai baim suga long ovasis inap taim ol yet i gat masin inap long wokim wahkain suga i save kam long ovasis.

Dispela nupela masin, bai ol i kisim sampela taim namel long 1983 long wokim spesel suga bilong ol sof dring.

Hetura Meja I Aut

"VANIMO Timba Projek em i wanpela bikpela developmen projek tasol long Wes Sepik Provins. Na Wes Sepik em i las provins tru long PNG sapos yu tingting long rot bilong developmen. Tasol gavman bilong PNG i no save wok hat long givim helpim long dispela provins."

Mista Andrew Koboni, Primia bilong Wes Sepik i mekim dispela toktok taim em i harim olsem gavman i pinisim dispela bikpela Filipino kampani, Hetura Meja, long wok bilong Vanimo Timba projek.

Nesenel Eksekutyutiv Kaunsil long kibung bilong en long 30, Desemba, i pinisim olgeta toktok bilong en long dispela bikpela kampani long wok long Vanimo timba bisnis. Long wanem Hetura Meja i no bin hariap long givim program bilong ol wok em bai kamapim insait long dispela timba projek. Na tu ol dispela program bilong ol i no redi long taim gavman i bin makim.

Minista bilong Fores, Mista Lukas Waka, i bin tokim NEC long dispela kibung olsem Hetura Meja i no bin bihainim ol samting i bin stap insait long tok orait ol i bin sainim long Epril 28, 1982.

Aninit long dispela tok orait, gavman i



Lucas Waka

givim 6-pela mun long Hetura Meja long raitim aut ol program bilong en long ol dispela samting:

- Trening na program bilong ol PNG pipel i kisim ol wok.
- Program bilong kamapim ol bikpela wok.
- Fores Plen.
- Fainans
- Lokal Bisnis Developmen.
- Maigresen.

Gavman i bin tokim Hetura Meja long stretim ol dispela program long 25 Oktoba 1982. Tasol Hetura Meja i askim gavman long moa taim we bai ol i ken pinisim olgeta ripot bilong ol. NEC i bin tok orait long givim ol 60 de moa. Na dispela 60 de i pinis long 25 Desemba 1982.

Long Janueri 12, 1983, bai NEC i kibung long Wewak, na bai ol toktok long wanem narapela kampani bai mekim wok long dispela bikpela timba projek long Vanimo.

Primia bilong Wes

kampani, i wok long katim timba nau long Wes Nu Briten Provins.

Jeneral Menesa i makim Nam Yang timba long Wes Nu Briten, na Halla Kooperesen, long Pot Mosbi, Mista Young-Moon Baik, i tok long 28, Desemba olsem, "Em i laik bilong gavman bilong PNG.

"Sapos gavman i askim mipela long developim dispela projek em bai mipela kamapim ol plan long rot em gavman yet i askim mipela long wokim."

Em i tok ol i redi tasol stap nau. Hetk-wata bilong Halla Kooperesen i i stap long Seoul Siti long Saut Korea.

Mista Koboni i tok tu olsem, em i no laikim moa planti toktok tumas. Em i tok, "Mipela i toktok inap 15 yia olgeta nau na no gat wanpela samting i bin kamap. Nau mi no laikim toktok. Mi laikim wok, na wok tru i mas kamap."

Primia bilong Wes Sepik i tok tu olsem, Sandaun Provins i no gat planti developmen projek nau. Long wanem, gavman i no gat bikpela tingting long provins bilong ol. Em i tok, Vanimo Timba projek inap long givim spes bilong 4,000 man long wok long timba projek. Na tu, inap long bringim bikpela winmani i kam insait long Sandaun Provinsal gavman, na PNG.

Gavman Salim Kumul 1

KEBINET i bin tok orait pinis long salim Kumul 1, smok balus bilong gavman i go long wanpela kampani long kantri Denmark long mak bilong K6.3 million. Gavman bai kisim mani na givim balus i go long han bilong dispela kampani em, Wol Jet Treting insait long mak bilong 3-pela mun.

Narapela kampani em i stap long Amerika i bin wokim dispela balus yet Galpstrim jet bilong amerika i laik baim long K5.8 million wanpela arapela kampani tu wantaim K3 milion.

Tasol gavman bai salim long dispela kampani i stap long Denmark wantaim 3 pesen komisin. Gav-

man i bin kisim tripela askim olgeta long baim dispela balus.

Praim Minista Mista Michael Somare i bin tok aut long dispela long kibung bilong ol niusman long Fonde, 16, Desemba. Dispela i bihainim kibung bilong kabinet long 15, Desemba. Insait long dispela kibung i bin i gat arapela bikpela wok tu em kabinet o Nesenel Eksekutyutiv Kaunsil i oraitim pinis.

Kabinet i oraitim tu K500,000 long Telefomin Developmen Projek na K1 milion long Kiunga, Lek Mari developmen projek. Dispela em plen bilong gavman long ol boda developmen. Na bai i gat ko-odineta i stap long Telefomin na wanpela long Kiunga na bai givim tok save i kam long gavman.

Narapela K300,000 kabinet i tok orait long wok bilong agrikalsa long Milen Be Provins.

Na kamapim nupela opis olsem "Opis ov Palimentri Afeas" em Minista Sir Pita Lus yet bai i go pas long en.

Na long dispela taim yet Praim Minista bilong bipo na lida bilong Pipels Progres Pati, Sir Julius Chan, i tok olsem mak bilong mani long salim dispela kumul 1 smok balus bilong gavman i gutpela tumas. Tasol em i askim olsem gavman bai putim dipela K6.3 milion long wanem hap nau.

Sir Julius i tok Pangu i promis long taim bilong ileksen kempain bilong en olsem sapos Pangu i kamap gavman bai em i salim smok balus ya na skelim K6 milion long


wan wan provins.

Em i tok, pastaim gavman bilong em i salim dispela balus inap long mak bilong K5.2 milion kina na nau Somare gavman bai kisim K7 milion olgeta wantaim kos bilong spea pat bilong dispela balus.

Mista Somare i tok, em i amamas long ol arapela kantri i laik putim mani bilong ol insait long PNG, maski sapos i gat bikpela hevi long wol na mak bilong wok mani i go daun. "Tasol i gat ol kantri i laik putim mani i kam long PNG. Na dispela i givim mi belgut."

Em i mekim dispela tok taim em tok aut long wanpela helpim i kam long kantri Frans long i kam long ol bikpela beng long dispela kantri long helpim na putim mani long dispela kantri.


PNG Poto Stori - 1982



1982 i makim yia bilong namba tu nesanel ileksen bilong PNG bihain long independens.



Planti pipel bai tingim 1982 long wanem Iambakey Okuk i lus long ileksen. Na Ted Diro i kisim ples bilong em olsem lida bilong Nesanel Pari.




1982 em i yia bilong Michael Somare. Pangu Pati i bin winim planti sit tru long ileksen na Somare i go pas gen long gavman.



Sir Julius Chan nau i stap long Oposisen.



Palamen i makim Kingsford Dibela long kisim wok bilong Gavana Jeneral.



Kwin Elijabeth i bin kam lukluk raun long PNG long Oktoba 13 na 14, 1982.



Sir Julius Chan i bin opim Ramu Suga Faktori.

1982 Wol Ripot



LONDON, INGLAN, 22 DESEMBA - Prinses Daiana bilong Wels i holim pikinini bilong em, Prins William long Kensington Pales. Ol i laik soim olsem Prins William i gat 6-pela mun olgeta long Trinde moning stret, 22 Desemba, 1982.



Saidon Lebanono 26 Jun - Samting olsem 19,885 pipel i bin dai na 31,915 pipel i kisim bagarap long Lebanon long pait namel long ol soldia bilong Israel na ol lain bilong PLO.



Faklan Ailan 24 Me - Wanpela soldia bilong Englan i hensapim wanpela soldia bilong Ajentina bihain long ol soldia bilong Ajentina i gipap long pait.

JANUERI

- 16 - Ol bikman bilong Katolik sios long Rom na Anglican sios long Englan i pren gen bihain long King Henry IV bilong Englan i bruk lusim Katolik sios moa long 450 yia i go pinis.

FEBRUERI

- 5 - Yunaitet Nesen Jeneral Asembli i laik olgeta kantri i no ken wok wantaim Israel, long wanem ol i tok Isreal i rong long kisim hap graun ol i kolim Golan Heights long Desemba 14, 1981.

- 2 - Ol soldia bilong kantri Siria i pait wantaim ol lain Muslim long Nor Damaskas. Samting olsem 10, 000 (ten tausen) pipel i bin dai long dispela birua.

MAS

- 18-30 - Ol bikman bilong ami bilong Israel i rausim ol meya bilong ol taun i stap long Wes Benk. Bihain long dispela, ol pipel i protes na kamap bikpela trabel we 7-pela pipel bilong Palestain na tupela soldia bilong Israel i bin dai.

- 24 - Sief ov staf bilong ami bilong Bangladash, Jeneral Hussain Muhammad Ershad i rausim na kisim ples bilong Presiden Abdus Sattar.

EPRIL

- Epril 2 - Ol soldia bilong kantri Ajentina i kisim Faklan Ailan em Englan i save lukautim. Tupela kantri i brukim pren namel long tupela.

- 5 - Ol sip bilong Royal Nevi bilong Englan i stat long sel i go long Faklan Ailan.

- 25 - Ol soldia bilong Israel i lusim Sinai long Ejip we ol i bin stap inap 15 yia olgeta. Ol i bin mekim dispela bihain long Israel na Ejip i stretim tok long pinisim ol trabel namel long tupela kantri.

- 25 - Ol soldia bilong Englan i kamap na kisim bek ailan bilong Saut Georgia long Faklan Ailan.

ME

- 1 - Woa namel long Englan na Ajentina long Faklan Ailan i stat. Ol balus bilong Englan i tromoi bom long Port Stanley, biktaun bilong Faklan.

- 12 - Juan Fernandez Krohn, wanpela Katolik pris bilong kantri Spen i traim long kilim Pop John Paul long taim em i go raun long kantri Potugel.

JUN

- 6 - Ol soldia bilong Israel i go insait long Lebanon.

- 13 - Namba 12 Wol Kap Soka Tunamen i stat long Spen. Itali i winim dispela kap. Dispela pilai i save kamap long olgeta 4-pela yia.

- 14 - Ol soldia bilong Ajentina i givap long pait long Faklan Ailan. Na ol lain soldia bilong Englan i holim pasim ol. Dispela woa namel long Ajentina na Englan i bin stap inap 3-pela muni olgeta.

OGAS

- 1 - Ol soldia bilong Israel i stat long muv i go insait long Wes Beirut long Lebanon long raunim ol paitman bilong lain Palestin Liberesen Ogenaisesen (PLO).

- 21 - Ol lain soldia bilong Frans i kamap long Beirut long stapim trabel namel long Israel na ol lain PLO. Lida bilong PLO, Yasser Arafat i lusim Lebanon na go long Tunis long 30 Ogas. Samting olsem 19,855 pipel i bin dai na 31,915 pipel i bin kisim bagarap long pait namel long ol soldia bilong Israel na ol lain PLO long Lebanon.

SEPTEMBER

- 14 Prsiden bilong Lebanon, Bechir Gemayel, i dai bihain long sampela lain i tromoi bom long em. Long neks de, ol soldia bilong Israel i go insait long Wes Beirut.

- Ol lain paitman bilong sampela Kristen grup i go insait long ol refuji kem long Sabra na Chatila long Wes Beirut, Lebanon, na kilim indai ol manmeri na pikinini. Ol lain soldia bilong Israel i bin stap yet long taim dispela birua i kamap.

OKTOBA

- 1 - Helmut Kohl i kamap lida bilong Wes Jemani.

- 8 - Palamen bilong Polan i stapim Solidariti Tred Yunion long mekim wok bilong en.

NOVEMBA

- 12 - Lida bilong Solidariti Tred Yunion long Polan, Lech Walesa i go fri. Em i bin stap long kalabus inap 11-pela mun olgeta.

DESEMBA

- 5 - Ol dokta long Nu Yok Amerika i putim wanpela lewa em ol man i mekim i go insait long bodi bilong Dokta Barney Clark. Em i namba wan taim tru long wol long ol dokta i mekim olsem.



DO YOU KNOW YOU CAN BUY INVESTMENT CORPORATION FUND SHARES AT ANY BRANCH OF THESE BANKS...



PAPUA NEW GUINEA



DEVELOPMENT BANK.

Westpac Bank - PNG - Limited

BANK OF SOUTH PACIFIC.



GIVIM HATWAN

Dia Edita - Mi askim Nesene! na Provinsal gavman. Yumi bai mekim wanem tru long ol stilman o rasket man husat i save stilim ol samting bilong ol kampani o hansapim o man na sekap long poket bilong ol manmeri?

Dispela kain pasin i no gat strongpela lo. Mi pilim sapos ol i no daunim, bai i go bikpela na PNG ba bagaran.

Mi yet i tingting olsem gavman bai tol orait long ol sekuriti o plishman i mas sutim ol indai na no gat kot na

no gat kompensesen. Sapos gavman i no laik orait, yupela mas painim wanpela strongpela lo tru na ol bai pret na sindaun i na no gat stil pasin mo bai kamap.

Simon Srua Aba, Yobamorua Viles, Simbu Proviins



MERI PNG I SENIS HARIAP TRU

Dia Edita - Mi wanpela boi i gat 18 krismas. Mi bilong Tanga Ailan. Mi laik askim long wanpela pepa mi lukim i stap long Arawa Yunivesiti, Not Solomon Proviins. Na pepa ya i tok olsem, watpo tru na ol meri PNG i senis hariap tru?

Watpo tru na ol i winim bikpela meri bilong PNG em Kwin Elisabet. Kwin i no putim trausis yet. Na olsem wanem tru PNG i winim em long dispela. Na mi ting dispela em i tru bikos long 1974, taim Kwin i kam long Rabaul, mi no bi

lukim em i putim samting bilong ol man. Nogat tru. Em i bin putim klos bilong ol meri yet. Na mi bin go lukim dispela na mi save dispela i mas tru.

Na tu yu husat meri i stap long Not Solomons Proviins i ken kam na lukim dispela pepa long yunivesiti long Arawa. Na tu mi ting olsem ol meri, PNG i mas sem long dispela. Planti samting ol i save putim em ol klok, singlis na trausis bilong ol man i no fit long ol.

Meri i gat planti pikinini i save putim trausis yet. Man, mi save sem tru long ol

dispela samting mi save lukim. Maski meri i lapun pinis tasol bai em i putim klok yet. Maski, bai yumi olgeta manmeri mas putim trausis na maski long pasim laplap.

Tromoi laplap na olgeta. Na bai yumi olgeta i kamap man tasol, maski nau long putim ol samting bilong ol meri. Ating bai ol meri long PNG i larim bikpela meri long putim samting bilong ol meri.

Raphae Timan, K. Melmel na M. Erwin Arawa, NSP.

TOK PROMIS WE?

Dia Edita - Mi bin lukim ol memba i tok promis olsem sapos Pangu i strong em bai i ken wokim rot gen, bilong inkam takis. Na olsem wanem long dispela tok promis bilong yupela, bai i kamap tru o no gat?

Man, mi bin sanap long ileksen long bikpela san na tulait wantaim na san i boinim stret skin



bilang mi. Na plis mi laik lukim yumi ol wokman na wokmeri bilong Papua Niugini i mas kisim mani bilong inkam takis gen.

A. Peni, Panguna, NSP.

TOK PISIN STRET

Dia Edita - Wari bilong mi i go olsem. Mi save harim sampela pipel i Tok Pisin na insait long Tok Pisin, ol i save putim sampela hap Inglis i go insait wantaim.

Yupela ol dispela kain man yupela i laik mekim stail long toktok bilong yupela o olsem wanem? Mi save harim dispela planti taim long ol politisen. Yupela i bungim Tok Pisin wantaim tok Inglis bai mipela ol yangpela manmeri i skul long Inglis bai i klia. Tasol tingim ol lapun manmeri bilong yumi.

Yupela ting bai ol i klia long tok bilong yupela? Mi ting no gat tru ya. Olsem na mi tokim yupela ol dispela kain man, sapos yu laik Tok Pisin, olgeta toktok i mas kamap long Tok Pisin tasol. No ken putim sampela hap Inglis o hap tok ples bilong yu wantaim i go insait.

Gengy Ringen, Kimbe.

BUS I KAMAPIM KAINANTU

Dia Edita - Bipo mi lukim long 1975 na 1976, Kainantu taun i klin na i no gat pipia na olgeta stua i luk nais. Tasol nau mi lukim em i olsem wanpela kopi plantesin. Na olgeta stua i rabis i nogut olgeta na das i karamapim ol.

Mi lukim i no stret Plis stesin i no luk olsem plis stesin, mi ting em i kopi plantesin. Tasol taur kaunsil i no lukautim gut taun.

Mi lukim long ai

bilang mi yet. Na i no stret. Plis Somare yu ting wanem? Mi laikim narapela man i mas senisim na lukautim gut dispela taun bilong mipela.

Mi laikim ol gavman i mas tingting gut na senisim ol dispela kain man. Nogut kain ol man i stap nating na pinisim mani bilong gavman. Na klostu dispela taun bilong Kainantu i bagarap. Na mipela planti manmeri long Kainantu i stap. Sapos

dispela taun i bagarap olgeta bai mipela i stap olsem wanem?

Kainantu em i longwe tru long Goroka. Olsem wanem na bai mipela i go antap long Goroka. Em bai mipela i hat tru long go antap. Mi ting em i no gutpela long mi. Plis Somare traim na senisim narapela man. Mi laikim ol gavman tu i mas sapotim tingting bilong mi. Na dispela stesin i mas stap gut na ol manmeri i ken painim kaikai gut long

dispela taun na ol samting.

Mi lukim klostu bus i kamap olsem na mi gat dispela tingting long tokaut. Na yu husat man o meri bilong Kainantu i harim dispela tok bilong mi, yu mas sapotim tingting bilong mi. Em i gutpela o no gat? Sapos yu ting em i tru yu mas sapotim mi.

Kanaupa Korai, Bararanda viles, Kainantu.

KISIM MANI LONG SIOS MAN

Dia Edita - Mi laik putim bikpela wari bilong mi. Insait long Nipa, mipela pipel wantaim ol kaunsil i no stap wanbel.

Ol Kaunsil i wokim wanpela nupela maket. Insait long dispela maket ol i bin putim tambu long autim Gutnius bilong God long ol pipel. Oli askim ol pasta long baim get pastaim. Em i gutpela we long baim get taim ol wokman bilong God i laik autim tok?

Mi ting mani bilong kaunsil i no kamapim wanpela wok. Nipa stesin i kamap bus, na haus bilong ol wokman i no gutpela tumas. Oli

no laik putim lo long sekim haus na planti narapela samting moa. Na ol i laik pinisim mani bilong ol pipel tasol. No gat sem bilong Nipa kaunsil. Yu i no laik mekim wok na painim deti mani bilong ol pipel.

Koboll K. Peya Koaso.

SUMATIN I HAT LONG PAINIM SKUL FI

Dia Edita - Mi wanpela sumatin bilong Heldsbach Youngpela Didiman skul long Finshafen. Mi lukim dispela pasin i no gutpela long ai bilong mi. Bel hev bilong mi em i go olsem.

Planti taim mi save lukim ol kampani i save kisim ol sumatin bilong hai skul tasol long wok long holid. Na mi no save lukim sampela sumatin bilong Tok Ples Skul i save wok long 91 kampani long i

ken painim ol liklik toea bilong baim skul fi.

Yes edita, mi wanpela manki bilong Madang. Mi save hat tru long painim skul fi. Sapos papamama bilong mi i stap em mi no inap long wari long skul fi. Olsem papamama i dai na mi save skul. Na mi go long ol kampani na mi save hat tru long painim wok. Olsem na inap long ol kampani i opti dua long mipela i go wok liklik long painim skul

fi? Nau em skul fi i go antap tru na ol kampani ol save ting ol manki bilong hai skul tasol i gat save long wok. Yu kampani, yu traim na yu kisim sampela sumatin bilong Tok Ples skul. Ating yu save wari long ol hai skul tasol. Plis mi laikim yupela mas sori long ol Tok Ples skul.

Tim Simon, Finshafen,



MIPELA SORI YET

Dia Edita - Msi bekim pas bilong Roy Koiro. Em i bin tok olsem em i ting i no stret long kisim kompensesen long indai bilong Korowi Mone na Primia bipo bilong Saten Hailans, Mista Andrew Andaijah hust i pundaun long Talai

balus na indai.

Mi tokim yu wanpela eksempl olsem, sapos yu wok olsem Mista Andrew Andaijah, na i gat bikpela wok tru wantaim Provinsal Asembi na yu kisim bikpela bagarap long ka, o balus, ol lain bilong yu inap

long kisim kompensesen long kampani laaka.

Yu i no tingim ol samting i ken kamap bihain. Sapos ol lain bilong yu o yu yet i kisim bagarap olsem ol i ken mekim olsem long yu tu ya. Mi askim yu Roy, olsem lain bilong Korowi na Andaijah i wok long sori yeti stap. Oli putim graut malumalu antap long skin bilong ol yet na i stap. Yu save long dispela na tingim o no gat.

Yu no laikim tingting bilong Saten Hailans, ating yu laik kisim ples bilong em. Mi laik save yu bilong wanem hap liklik ples na sab distrik. Primia, Fegi Abiel toktok long krotoktok bilong em na samting tru, no kamap yet. Taim bilong sori

na krai yu save tok wanem, em i olsem rasol. Traim na yu i stap long ples bilong ol masta, samting. Yu tok yu i stap long Kieta, tasol mi save yu i stap tasol hia long Mendi tasol na tok olsem.

Ating yu no save tingting sori long brata bilong yu. Na yu save givim kaikai long bel na maus bilong yu tasol. Mipela planti bilong Saten Hailans i no sapotim tingting bilong yu. Yu i no ken raitim dispela kain pas moa.

Tabale Wandiria, Mt. Hagen, WHP.

BIABIA



1982 Long PNG

Air Niugini Long 1982

MISTA Bob Wallace, Pablik Rilesen man bilong Air Niugini i tok olsem, yia 1982 em i wanpela gutpela yia tru bilong Air Niugini. Long wanem, long dispela yia Air Niugini i opim planti napela rot bilong balus bilong ol long planti kantri ausait long PNG na tu insait long PNG.

Bob Wallace i tok tu olsem 1982 em i wanpela hatpela yia tru bilong Air Niugini, long wanem, planti samting i bin kamap long dispela yia long kampani bilong ol.

Namba wan samting tru Air Niugini i mekim long yia 1982 em long karim ol studen long PNG i go daun long Australia.

F28 balus i kirap long Bougainville na go long Taunsvile long Janu-eri. Bihain ol i mekim wankain ran tasol long Epril na tu long Oktoba.

Februari 2: Namba tu Das 7 balus i bin kamap long PNG. Namba wan Das 7 balus i kamap long PNG long Novemba 1981, na stat wok long Desemba 14 long 1981 tasol.

Me 3: Namba tri Das 7 balus i kamap long PNG. Na dispela i bringim namba bilong Das 7 balus i go inap long tripela.

Julai: Air Niugini i statim ran bilong karim ol soldia bilong Fiji i go long Midel Is long taim bilong pait long hap. Air Niugini i mekim 6-pela ran olgeta long Midel Is na kam bek

gen long Fiji na PNG long namel bilong dispela yia 1982.

Ogas: Air Niugini i statim ran bilong ol F28 balus long go long Rabaul na kam bek gen long Mosbi.

Oktoba 7: Air Niugini i mekim namba wan ran i go long Tokyo long Japan, long F28 balus.

Oktoba 15: VIP sata bilong Air Niugini i go long Fiji, long F28 balus, bringim Prait Minista i go long wanpela kibung bilong Rijonal Komonwelt Gavman.

Novemba 3: Air Niugini i mekim namba wan ran bilong F28 balus i go long Oklan, wanpela siti long Nu Silan. Na long Novemba 5, Air Niugini i mekim namba wan ran bilong ol i go long Guam.

Novemba: Air Niugini i mekim namba wan ran bilong ol i go long Kiunga, Mendi na Simbu.

Desemba 6: Air Niugini i sainim kontrak wantaim Ok Tedi long helpim ol long karim ol kago bilong Ok Tedi Kopaigo long Kiunga inap 18 mun, stat long 1983.

Novemba 6: Air Niugini bai karim kago bilong Ok Tedi 6-pela de long wanpela wik. Dispela sata em i kos moa long K2 milion i kam long Ok Tedi.

Sampela taim namel long yia 1982, gavman bilong PNG i bin sata long Air Niugini, Boing 707, long kisim ol kago i go daun long Melbon, Australia. Dispela em i namba wan sata bilong gavman long Boing 707, balus bilong Air Niugini.

Ol Birua Long Balus

LONG 1982 i gat 20 liklik balus i painim birua na 6-pela manmeri i bin dai.

Dispela ripot bilong ol birua long balus long 1982 i no bin kilim planti manmeri. Long Novemba, wanpela balus bilong Talair i bin pundaun long ol maunten bilong Tari na provinsal minista bilong edukesen bilong Saten Hailans Provins Korowi Mone na meri bilong em i bin dai.

Mista Nigel Young, Suprintenden bilong Air Sefti Investigesen,

i kam long pes 2

• Saiden Tom Irai bilong Walium Plis Kem long Madang Provins i kisim medal long gutpela wok em i mekim long Plis Fos.

• Mista Morea Ke-vau bilong Hanuabada Viles, Mosbi i kisim dispela medal tu, long wanem em i bin helpim pablik sevis olsem wanpela gutpela draiva.

(Wok bilong painim ol wanem kain rong i mekim ol balus i pundaun o painim birua) i tok olsem 1982 em i wanpela tupela yia. Long wanem, planti manmeri ino dai long dispela yia.

Rekot bilong ol balus i painim birua stat long yia 1973 i kam inap 1982 em hia:

1973 - 22 balus i painim birua. 10-pela man i dai.

1974 - 22 balus i painim birua. 24 manmeri i dai.

1975 - 24 balus i painim birua. 4-pela

manmeri i dai. 1976 - 22 balus i painim birua. 17 manmeri i dai.

1977 - 17 balus i painim birua. 9-pela manmeri i dai.

1978 - 20 balus i painim birua. 11-pela manmeri i dai.

1979 - 25 balus i painim birua. 31 manmeri i dai.

1980 - 28 balus i painim birua. 14 manmeri i dai.

1981 - 18 balus i painim birua. 10-pela manmeri i dai.

1982 - 20 balus i painim birua. 6-pela manmeri i dai.

• Saiden James Senat bilong Kimbe Plis Stesin i bin kisim dispela medal tu long gutpela wok em i mekim wantaim Plis Fos.

Q.P.M

• Asisten Komisina bilong Plis, Mista Thomas Samai i kisim dispela mak long ol gutpela wok em i mekim long Plis Fos.

Em i Dairekta bilong Woks na Lojistik Divisen long Plis Hetkota long Mosbi.

• Sief Suprintenden Ronald Phillip Symonds i kisim dispela medal tu long ol gutpela wok em i mekim insait long Plis Fos. Em i Dairekta bilong Etministresen, Pesonal na Trening Divisen long Plis Hetkota long Mosbi.

Ol Trabel Bilong 1982 Krismas Holide

MISTA David Tasion, Ekting Komisina bilong Plis long Mosbi i bin givim bikpela tenkyu tru i go long olgeta pipel insait onng PNG long Tunde moning, Desemba 28, 1982.

Em i amamas tru, long wanem ol pipel i helpim ol plisman long stapim ol pasin nogut na kain kain trabel i kamap namel long Krismas. Em i tok dispela pasin tasol i mekim na i no gat planti bikpela trabel i kamap long dispela taim.

Em i tok i gat 39 bikpela trabel tasol i bin kamap insait long PNG namel long Sarere, Desemba 25 i kam inap long Tunde, Desemba 28, 1982. Na long Krismas de stret i gat 7-pela bikpela trabel tasol i bin kamap.

Em i amamas long gutpela wok ol plisman i bin mekim long stapim trabel long dispela taim. Planti trabel i no kamap, long wanem ol plisman i bin wokabout raun long olgeta ples insait long PNG na lukluk gut long ol samting long ol dispela de.

Mista Tasion i tokaut tu olsem ol plisman bai mekim patrol long ol biktaun na lukautim ol samting i kamap long Nu Yia. Daunbilo em lista bilong ol bikpela trabel i kamap namel long Desemba 25 i kam inap long Desemba 28:

Brukim haus na stilim samting - 22.

Stilim ka - 1.

Giaman na stilim mani - 1.

Kukim haus long paia - 1.

Kilim man - 4.

Katim man long naip - 1.

Paitim man na stilim samting - 2.

Bikpela pait - 2.

Paitim man - 1.

Insait long dispela 39 trabel olgeta, ol plisman i bin holim pasim 21 man. Plisman i wok long holim narapela 6-pela man long askim ol long trabel ol i mekim. Ol plisman i save pinis long ol man husat i mekim tupela arapela trabel, tasol plisman i no holim pasim ol yet.

TRABEL BILONG OL KA

Plis Hetkota long Mosbi i no kisim namba bilong ol bagarap bilong ka tasol ol i tok 67 birua olgeta i

bin kamap long dispela taim.

I gat tripela bikpela birua bilong ka i bin kamap - tupela bilong ol i kamap long Mosbi na narapela i kamap long Isten Hailans Provins. Na insait long dispela 67 birua bilong ka, 37 birua olgeta i kamap long Mosbi.

Hia em lista bilong ol bikpela trabel i kamap long wan ran rijon namel long Desemba 25 na 28, 1982:

Nesanel Kapital Distrik

(Mosbi Siti) Desemba 25

Brukim haus - 4

Desemba 26, 1982

Brukim haus - 2

Stilim ka - 1

Desemba 27

Bagarapim meri - 2

Brukim haus - 6

Katim man long naip - 1

Paitim man - 1

Desemba 28

Brukim haus - 2

Stilim samting - 1

'A' Divisen (Sauten Rijon)

Desemba 25

No gat

Desemba 26

Brukim haus - 1

Desemba 27

Kukim haus long paia 1

Bikpela pait - 1

Desemba 28

stilim samting 1

'B' Divisen (Hailans) Desemba 25
Brukim haus - 2
Desemba 26
Bagarapim meri - 1
Brukim haus 3
Desemba 27
Brukim haus - 2
Desemba 28
No gat

'C' Divisen (Not Kos) Desemba 25
No gat
Desemba 26
No gat
Desemba 27
Kilim man - 1
Bikpela pait - 1
Desemba 28
Kilim man - 1

'D' Divisen (Niugini Ailan) Desemba 25
Stilim mani - 1
Desemba 26
Kilim man - 1
Desemba 27
No gat
Desemba 28
Bagaraim meri - 1

I gat planti bikpela trabel i bin kamap namel long namba wan de bilong mun Janu-eri, 1982 na Fraide, Desemba 31, 1982. Man i go pas long Pablik Rilesen Opis long Plis Hetkota long Mosbi, Mista Graeme War-

rener i no kisim yet ripot bilong olgeta divisen insait long PNG. Ol dispela ripot bai soim namba bilong kain kain trabel na birua i kamap insait long PNG namel long yia 1982.

Mista Warrenner i tokaut olsem "Ripot bilong Yia 1982 bai redi namel long mun Februari, 1983 bihain long taim ol i bungim olgeta ripot long wanpela pepa.

Hia em i lista bilong ol trabel i kamap long yia 1979, 1980 na 1981.

1979
Ol bikpela trabel - 26,822
Birua bilong ka - 6,144

1980
Ol bikpela trabel - 18,183
Birua bilong ka - 5,901


1981
Ol bikpela trabel - 20,473
Birua bilong ka - 6,829

Namba bilong ol trabel na birua i wok long go antap long olgeta yia. Ol namba i wok long senis na i luk olsem namba bilong ol trabel namel long yia 1982 bai go antap moa.

GET TO KNOW "WHAT'S ON" around PNG every day with Niugini Plus and the Weekender

Lukluk Bek Long 1982

HEPI Nu Yia olgeta. Na ating planti bilong yupela i mekim bikpela pati long selebretim krismas bilong 1982 na redi pinis long wetim Nu Yia 1983. Yumi tok gut bai long yia 1982. Dispela yia i inis nau na i no inap long kam bek gen. Yu ting wanem long dispela yia, em i gutpela yia o i yia nogut? Na yu laik lukim wanem samting tru long kamap long yia 1983?



Kathie Malara

Kathie Malara em i bilong Iokea long Galp Provins. Em i save wok long stua bilong Haus

Bilas long Boroko long Mosbi.

Kathie Malara i tok olsem, "1982 em i wanpela gutpela yia bilong mi stret. Long wanem, pastaim tru kwin bilong Ingran i bin kam raun long Mosbi na dispela em i namba tu taim bilong mi long lukim em."

Yia 1982 tu i bringim ol yangpela manki bilong Australia, Fiji na Nu Silan long kam long PNG na pilai soka. Mi amamas tru long lukim ol tu."

Kathie tok tu olsem, yia 1982 em i wanpela strongpela yia tu long wanem dispela yia em i yia we kantri i sot long

mani. Tasol gavman bilong Somare i strong moa na no gat bikpela hevi i kamap long kantri.

Kathie i tok olsem, wanpela samting tasol i rongim dispela yia 1982 em long wanem draipela san na ais i bagarapim ol gaden bilong ol manmeri long ples. Em i tok "Mi laikim yia 1983 i mas moa gut long yia 1983. Mi laik lukim planti developmen i kamap long Mosbi long narapela yia na mi laik lukim gavman bilong yumi i kamap wantaim planti gutpela tingting long mekim kantri i go het."

Yu Ting Wanem?



Alois Ruarri

Alois Ruarri em i bilong Mikarew viles long hap long Bogia, Madang

Provins. Ruarri i wok long Burns Philp long Boroko. Em i treni menesa bilong ol samting bilong stua.

Alois Ruarri i tok olsem, "Dispela yia 1982 em i wanpela nogut yia bilong mi tru. Bikos kantri bilong yumi i sot long mani na wok bilong mi i no ran gut. Mipela i pasim planti liklik stua bilong mipela long Alotau, Daru, Samarai, Wau na Bulolo tu."

Tasol 1982 i bin bringim bikpela tenis tru long laip bilong mi. Mi amamas tru long painim dispela wok long Burns Philp. Olsem na mi laik tok tenkyu i go long yia 1982 na mi laik tok sori tu olsem bai mi no inap tru long bungim dispela yia gen."

Nakupe Yokai em i bilong liklik ailan Bunai long Manus Provins. Em i kam raun tasol long Mosbi long Krismas holide.

Yokai i tok olsem, "Yia 1982 em i wanpela yia nogut tru. Mi tingting go bek long ol narapela yia na mi ting em i wanpela rabis yia tru bilong ol politisen na ol manmeri bilong ples."

"Bikpela sani bagarapim tru ol gaden bilong ol man long ailan na bikela san i pinisim kaikai bilong ol man long Hailans. Olsem na yumi i no inap long tok olsem dispela yia em i gutpela yia. Mani i sot tu long wok na long kantri na ol politisen i wok long kros planti long ol amting i no kamap gut long kantri. Nesenel



Nakupe Yokai

ileksen tu i no ran gut na planti politiesen i tok kros nabaut long dispela tu.

Yokai i tok olsem, em i laik lukim 1983 i narakin long dispela yia. Ol politisen i no ken kros tumas na traimekim gut wok bilong ol. Em i tok olsem em i laik lukim developmen i kamap long kantri na gavman i no ken sindaun nating.

Winim K50

Wantok Namba Resis No. 5

Makim 6-pela Namba

34	2	4	13	23
6	22	16	9	17
14	10	35	40	21
38	11	3	27	18
20	31	26	33	15
7	28	24	5	37

Putim X antap long ol 6-pela namba yu laik makim.

Nem _____

P.O. Box _____

Taun _____

Kolim nem bilong tupela ailan long Not Solomon Provins.

Insait long pasel mipela makim pinis 6-pela namba. Traim painim sapos yu makim stret dispela 6-pela namba bai yu winim K50. Sapos no gat man i makim stret orait man i kam klostu tru bai winim K10.


Taitim bun, sekim kru, klaaim ai na makim namba.

Salim i kam long Wantok Namba Resis Box 1982 Boroko.

Alois Giva em i wanpela sekjurit opisa long Burns Philp. Em i bilong Guhi viles, long Wes Nu Briten Provins.

Giva i tok olsem, "Yia 1982 em i wanpela smarpela yia olsem yia 1981."

"Long dispela yia mi no bin painim wanpela birua liklik. No gat sik nogut i painim mi na no gat man i paitim mi tu. Na mi laikim yia 1983 tu i mas wankain tasol. Mi amamas tru olsem long dispela yia ol planti politisen i mekim planti mauswara long mipela na mipela ting tru na i wet nating i stap na yia i pinis. Mi laikim tru dispela pasin. Mi les pinis long mekim planti wok. Yumi mas



Alois Giva

giaman nating i stap na kisim mani tasol.

"Mi laik bai yumi trikim ol manmeri nabaut i stap na yia 1983 tu i pinis nating. Long dispela kain pasin tasol bai kantri bilong yumi i go het moa na no gat trabel i ken kamap long yumi."


William Silakum i bilong Rempi Viles klostu long Madang taun, i tok olsem, yia 1982 em i wanpela

gutpela yia tru bilong mipela ol gras rut. Silakum i save wok long Medikel Platun long Taurama Bareks.

Johanna Atta em i bilong Is Sepik Provins. Liklik ples bilong em Biwat, tasol em i stap nau long Mosbi long Gordon Plis Bareks.

Johanna i ting olsem yia 1982 em i gutpela yia tru. Em i tok, "Mi amamas tru long dispela yia long wanem, pastaim tru, Michael Thomas Somare i kam bek gen olsem Praitim Minista bilong PNG. Mi laikim gavman bilong em na olgeta samting gavman bilong em i mekim."

"Sapos sampela manmeri i ting olsem dispela yia i no gutpela, em long wanem Somare i kisim gavman




Johanna Atta

long namel bilong yia na i no gat bikpela taim bilong em i stretim ol samting na kranki nabaut long gavman. Mi ting yia 1983 bai wankain tasol long yia 1981 na 1982. Dispela tupela yia tu i gutpela yia tru."

Em i wanpela soldia.

Silakum i tok olsem, "1982 i no bin bringim bikpela trabel olsem woa o bikpela sik nogut bilong kilim bikpela namba bilong ol manmeri olsem i save kamap long ol narapela kantri. Yumi kisim liklik trabel bilong ais i pundaun long Hailans na bikpela san i bagarapim gaden, tasol ol dispela samting i no kilim dai planti manmeri olsem bikpela guria bilong 1971 i bin bagaraim yumi."

"Long yia 1982, mi bin painim planti pren na ol imekim sindaun bilong mi gutpela tasol. Olsem na mi laik lukim



William Silakum

yia 1983 tu i mas go gut tasol olsem yia 1982. Na mi pinisim toktok bilong mi wantaim bikpela tok tenkyu long olgeta pipel long PNG long mekim yia 1982 i gutpela yia tru."



HERA HERA FASHIONS

Nupela stail
HERA HERA FASHIONS

Ol nupela smarpela stail klos bilong putim long wok, pati, raun na bilong disko na tu ol smarpela stail bilas bilong han na nek.

Graun Plua,
Invesmen Haus,
ANZ Bank, Douglas St.,
Port Moresby.



Going Places




High School at home - COES helps
you with your studies.

COLLEGE OF EXTERNAL STUDIES

COLLEGE OF EXTERNAL STUDIES

No. 29



Steam from hot ground in a volcanic area of New Zealand is used to make electricity.




Today we learn about RENEWABLE energy sources.

That means an energysupply which is new each day.



The sun is our most important source of new energy for each day. the sun makes our food grow which give us energy to work. The sun makes the trees grow, which give us firewood to cook our food.

The sun also works the water cycle to gives us hydroelectric power. The sun helps winds to blow. In some countries windmills give power.



On the roof of an average house in PNG the sunlight is enough to supply the energy needs of 20 homes.

Heat from the sun can be used to make water hot for houses. Sunlight can even be used to make a small amount of electricity. When we use energy from the sun to give us power, we call it SOLAR POWER.

The fossil fuels - coal, oil and gas - will all run out some day. But renewable energy sources are new each day.



QUESTION: Put a circle around the letter of each energy source that is RENEWABLE. The first one has been done for you.


- A. Sun, B. Tides, C. Oil, D. Waves, E. Firewood, F. Geothermal, G. Gas, H. Food, I. Hydroelectricity, J. Coal, K. Solar, L. Ocean currents.

ANSWER: A, B, D, E, F, H, I, K, L.


CHALLENGES

Are YOUR eyes fooled?


1. Which line is longer, A or B?




2. Which circle is bigger, A or B?



3. Which woman is taller, A or B?



4. Which line goes through X?



Answers: upside down

Do these puzzles by marking the sizes on the edge of a bit of paper. You might be surprised to find that the two sizes are the same in each picture. Line X goes to line B number (4) four.


SPEED

Speed measures how fast something is moving.

Speed is measured in kilometres per hour (km/h)




6 kilometres per hour
6 km/h




15 kilometres per hour
15 km/h



25 kilometres per hour
25 km/h



50 kilometres per hour
50 km/h



470 kilometres per hour
470 km/h.

GOING PLACES PULL - OUT POSTER

EVERYDAY LIFE IN OTHER PLACES

Sky Watchers

THERE are planets and stars; comets and meteors; rocks that just seem to drift in space. And they all hang together in the star-city galaxies that seem to go on forever in the universe.

So that's the universe. That's all there is to it. Is it?

There are many strange things in the universe that the sky watchers are just beginning to find out about. And there are probably countless others that will never be known things that our minds could never understand.

I remember when I was about ten, reading a science-fiction story about sailing ships. But these ships were different. They didn't sail on water, they sailed out in space. They were like space ships with sails. The "wind" that pushed them along was supposed to be a space wind that blew from the sun. I liked the story but I knew that there couldn't be a wind.

But there is. It is called the "solar wind." It is not a wind of air. It is a hot wind that is really a part of the sun. As the sun spins, it throws off bits of itself into space. The solar wind is those bits of sun. Sometimes it blows in gusts. Space ships have to allow for the solar wind or they could get blown off course.

Probably the most puzzling thing of all, the sky watchers *think* they have found out in space *black holes*. What's a black hole?

Say you take a drink can and squeeze it. The sides push in a little. Squeeze it again till it bends in half. That's easy. But say you keep on squeezing it - crushing it with your hands, jumping up and down on it, pounding it with rocks. How small can you get it? It won't squeeze up any more you think. But it would if you could get someone strong enough to do it. The can could be crushed to the size of a ten cent coin, or smaller.

And what if a person, a million, million, million times stronger than the person who crushed the can to the size of a ten cent coin, began to squeeze the earth? What if he crushed the sides, grinding the mountains to dust? He squeezes the earth till it is half its size, one quarter its size, till it is no bigger than a house, a car. And still he keeps on squeezing until the whole earth is small enough to fit inside a matchbox.


Then the earth would be like a black hole. The pull of gravity coming from this matchbox-earth would be so strong that someone 5000 kilometres away might be torn apart by it! It would be like a tremendous force, dragging everything from thousands of kilometres away into-planets, maybe even stars if they were close enough.

Everything, even light, would be sucked into the matchbox-earth and crushed into nothing.

It would be a tiny, deadly, bottomless pit floating out in space.

But where do you get someone strong enough to do all that?

Scientists say that a black hole can be formed when a star dies and collapses, like a building crushing down on itself. The weight of the



star crushing in on itself could be strong enough to squeeze it into a black hole. But no one really knows for sure. No one can even be certain that black holes are there at all. No one has seen them because they suck up the light. They are invisible.

It seems unbelievable. Still, many sky watchers believe, that somewhere out in space thousands of tiny black holes are quietly sucking away the universe.

by Mark Oakey
NSW Department of Education



Paradise

FOR FRESHNESS AND QUALITY ... PARADISE BISCUITS

ALSO THE MAKERS OF FINE



Bread, Pies, Pasties and Donuts

PARADISE
BAKERY GROUP

PORT MORESBY
Kumar St. Hobobs
P.O. Box 1624, Boroko
ph. 25 5124

LAE
Butubum Rd., Laraka
P.O. Box 2173, Lae
ph. 45 7177

RABAUL
Vulcan St. Rabaul
P.O. Box 257, Rabaul
ph. 92 1957

HEB 1785



**Yu painim ol
gutpela
samting long
mekim long
holide taim?**

**PAINIM OL INSAIT
LONG DESEMBA**

**NEW
NATION**

Ol i salim nau—60toea tasol.

PROMIS NATING

Dia Edita - Long taim bilong kempen bilong ol Pangu pati, kendidet, yupela bin toktok olsem, sapos Pangu i winim gavman olgeta skul na haus sik bai no gat pe. Na bai ol pipel i kisim fri marasin na skul.

Tasol long Manda 8 Novemba, 1982 mi harim redio olsem skul fi bai go antap long K60. Olsem na mi gat bikpela wari na askim yupela ol Pangu gavman ating yupela i paulim mipela ol pipel o wanem?

Mipela i ting ol toktok, yupela ol kendidet i mekim bai i kamap tru olsem na

mipela i wet i stap. Yupela i tok olsem:

1. Fri skul, na marasin long ol sik manmeri.

2. Daunim prais bilong ol samting long stua.

3. Apim prais bilong kakao, kopi na kopra na tu welpam.

Simon Sirua,
Koire Viles,
Simbu Provins.



OL TARI MAS KIRAPIM TAUN

Dia Edita - Mi wanpela liklik manki Tari nau mi gat bikpela wari long ol lain bilong mi husat i raun nabaut long taun. Sampela ol i winim 20 o 30 yia na sampela i wokim bisnis na sindaun nabaut long ol taun. Inap yupela traim na kam bek long ples na wokim bisnis. Na larim ples bilong yupela i kamap olsem ol arapela taun.

Yupela raun longwe

na yupela i ting ol bikman bilong yupela bai helpim yupela long developim ples. Nogat tru ya. Yu yet bai kirapim ples bilong yu.

Ol brata, yupela i no sem long lukim ples bilong oli kamap olsem taun na ples bilong yupela yet i stap long bus? Mi tokim yupela olsem, wanem mani yupela i gat long en, i no ken lusim long taun. Karim i kam bek long

ples bilong yupela na wokim bisnis. Na tu no ken winim planti krismas long taun, traim na kam bek long ples.

I luk olsem ples bilong yupela wari i pulap na yupela i painim graun. Ating het bilong yupela i olsem ston stret.

John. T. Andigi,
Kundiawa, Simbu Provins.

PUTIM PAIA STESIN LONG MENDI

Dia Edita - Mi laik autim wari bilong mi i go long gavman. Mipela ol pipel na wokman i stap insait long Mendi i laikim gavman i mas traim na wokim wanpela paia stesin haus insait long Mendi taun. Na putim ol samting bilong kilim dai paia na ka samting.

Sapos gavman i no inap long painim ol paia sevis man na peim ol long olgeta fotnait, orait, wanpela saveman i mas kam na skulim ol lain plisman bilong mipela hia yet long taun. Na taim ol i duti long nait na long san tu ol i ken was.

Mipela askim long dispela long wanen, dispela yia tasol, wanpela haus i bin paia na tu tarangu wanpela lapun meri wantaim tu i paia, hia yet long Mendi taun. Sapos haus i paia long sampela taim, i no gat taim long askim ol paiaman long Hagen long kam helpim mipela. Em bai tulet. Olsem na mipela askim minista husat i bosim paia sevis dipatmen long lukluk long dispela wari bilong mipela.

Alloy Zin,
SHM Authority,
Mendi, SHP.

TINGIM OL PIPEL

Dia Edita - Watpo tru na gavman i no apim pe bilong kopra, kakao na kopi? Bikos

em i bin promis bipo pinis olsem na mipela i wetim yu Somare, long apim kwik, long wanem prais i go daun pinis.

Bikos pipel yet i mekim yupela kamap gavman na maski long sindaun tasol long palamen na tingting long poket mani tasol.

Mi tokim yupela stret, ol nesanel memba na ol provinsal memba. Sapos yupela i harim tok bilong ol pipel long ples na wokim ol samting, ol pipel bai amamas tasol long yupela. Na bai ol i votim yupela gen long palamen.

Alphonse Elixson,
Kieta, NSP.

MASKI KROS NATING

Dia Edita - Mi bin ritim Wantok Niuspepa, namba 444 na mi lukim wari bilong Sunavi Otio na mi tu nau mi laik sapotim em.

Yes ol wantok, yupela i kisim dispela save we na yupela i save kros planti. Mi save yupela ol man i resis wantaim Otio long ileksen na ol sapor bilong ol i save kros. Long wanem yupela i no winim ileksen na yupela i jeles nating. Bipo long 1972, em i bin sanap resis long ileksen na planti pipel i bin laikim em. Na ol i votim em i go long palamen.

Mista Otio em i

wanpela man bilong toktok na pait hat long bringim developmen i kam insait long Lufa na Goroka. Olpela memba, Papuna i no bin bringim sampela wok helpim i go long dispela yupela hap. Tasol taim Otio holim dispela wok i kam inap nau, yupela i lukim bris, skul na rot i kamap long maus bilong husat tru? Ating mobeta yupela i opim ai na lukluk gut pastaim na bihain yupela ken kros.

Yu husat i kros bai i ken bringim developmen i go long Lufa hariap tasol? Skul i kamap long maus bilong em tasol na

planti manmeri, pikinini tu i kisim save. Olsem na yupela i laik wok politik na daunim nem bilong em.

Em mi tok klia olsem, sepos Somare i givin wok minista i go long em, inap em i bringim planti wok i go, tasol nogat.

Mi save lukim planti taim yupela i save raitim pas i go long Edita na kros. Spika long palamen i no inap makim memba nating long toktok, yupela yusim het bilong yupela. Na maski long kros nating.

K. Iyoni,
Tomaringa, PMF,
Rabaul, ENBP.

Planti pipel i les olgeta long lukim prais long ol samting long stua i go antap tru na samting mipela i save wokim na kisim mani long en i go daun tru. Dispela em i wanem sam pasin tru gavman i mekim long ol pipel.

Traim na helpim ol pipel na yupela i mas harim tok bilong ol.

ENGA MAS KISIM BEK TAITEL

Dia Edita - Mi laik bekim pas bilong ol dispela 4-pela man. Ol man ya em Kae. K, Kalino. P, Yukino, P na K. Kipu. Pas bilong ol i kamap long Wantok namba 440. Oli tok olsem John Aba i save pasim ples bilong ol narapela gutpela boksa.

Ating yupela i jeles long John Aba o husat i save. Mi laik save olsem yupela i bin lukluk long taim John Aba i pait wantaim Pedroza na Gary William o no gat? Ating yupela i bin raitim nating tasol pas i go long Wantok niuspepa. Em dispela tingting bilong yupela i kam tingting bilong ol liklik manki. Sapos yupela i gat save, yupela inap save olsem wanem ol i raitim long niuspepa.

Na i no gutpela tumas long sapotim ol boksa bilong narapela kantri, em ol i save kam pait long hia. Long pait bilong John Aba na Esubio Pedroza, em Pedroza i win. Em i givin nokaut long John Aba, (K.O). Na olsem wanem reperi i no lukim gut?

Na long pait wantaim Gary William,

John i win. Na dispela masel tait, em i kisim long lek bilong em bihain long pait i pinis. John tu i no pundaun long wanpela raun. Dispela em 3 minit insait long wanpela raun na i bin i go inap 15 raun olgeta.

Sapos yupela ol spotman, yupela inap save olsem wanem na masel tait i save kamap long lek. Wanem samting i save kamapim dispela samting? Dispela pas bilong yupela i soim stret olsem yupela i no save long wanpela pilai.

Na ol jas i save jasim pait long hia i mas i gat 3 o 4-pela jas. Sampela bilong ol dispela jas i save kam long Australia.

Mi laik save olsem wanem John i save pasim ples bilong ol narapela boksa? Wanem, John i pasim ples bilong sindaun o slip? Traim yusim gut het bilong yupela na raitim kain pas olsem. Na nau John i lusim nating taitel bilong em pinis.

Mi laikim wanpela long yupela o wanpela boksa bilong Enga i mas kisim bek dispela taitel i kam long PNG, sapos yupela inap. Sapos yupela i bel

kaskas, mi tok, traim gen.

Steven Morris,
Arawa, NSP.

Tok Save i go long ol man i save salim pas long Wantok. Sapos yu no putim nem tru bilong yu long pas mipela i no inap prinim leta bilong yu.

SAPOTIM MEMBA

Dia Edita - Mi laik bekim pas bilong brata Julius Hadae i bin kamap long Sarere 16 Oktoba. Em i toktok long nupela memba bilong Okapa open, Mista Labi Yabanoya i no save opim maus bilong em long toktok.

Brata, inap yu tok klia hamas namba bilong olpela memba long bipo. Orait sapos yu i no save bai mi tokim yu na bai yu ken save. Namba wan olpela memba em Muriso Warebu na namba tu em John Pokia na las memba em Billy Hai. Em ol tripela olpela memba bipo yumi bin gat.

Tasol long dispela 15 krismas ol i stap i kam

Wes Nu Briten long taim ol i sot long kaikai o wari samting. Ating yupela i save mekim wantok sistem.

Taim mi skul yet, mi save harim na mi pilim ol man i wok long gavman i save wokim wantok sistem. Mipela ol Is Sepik Provins taim mipela i sot long kaikai na singaut long gavman long helpim, tasol ol i no save lukluk long mipela. Em i no gutpela pasin. Traim na tingting long ol Sepik pipel.

Teddy Miaba,
Lae, Morobe Provins.

CALLING ALL BANDS WE SELL

- amplifiers & speakers
- drumsets, sticks, skins
- guitars; electric; bass and ordinary
- strings & keys
- Music Books
- na ol kainkain samting long music

TAIM pawa gita, dram na ol arapela samting long pilai long ben i lapun pinis na yu laikim nupela, kisim ol i kam long mipela. Bai mipela salim ol nupela ben samting long yupela long liklik prais tasol.

ROOK'S RADIO
PO BOX 191 LAE
behind B.P.
PH-42 4616

Ol Meri Long Wok Politik

ISTEN Hailans Provinsal gavman nau i gat wanpela nupela meri, em bai makim ol meri long dispela provins insait long **Provinsal Asembli. Dispela meri, Mis Pauline Masena, i gat 19 krismas tasol na i kam long Kaoru viles long distrik bilong Okapa.**

Mis Pauline Masena, husat i bin kisim 14 vot i winim Mis Angelo Soso husat i kisim 3 vot, Misis Vinoso Onena 7 na

Misis Anna Kasemu 3 vot.

Meri husat i bi holim dispela wo bipo, Misis Daga Anakapu i no bin resigen long wanem em i bin resis long sit bilong Goroka Taun insait long Provinsal ileksen.

Mis Masena i tok, bikpela wari bilong mi nau em long kamapim gutpela sindaun long ol meri insait long Isten Hailans. Na mi gat pinis ol plen bilong mi long mekim wok, maski olsem em i pes taim bilong mi long stap insait long wok

politik.

"Mi glasim gut tru olsem ol meri i mekim wok wantaim ol Yut grup insait long provins i mas kisim bikpela helpim i kam long mi na provinsal gavman."

I bin gat 3-pela meri na wantaim Mis Masena, ol lokal gavman kaunsil bilong ol i bin nominetim. Na Okapa lokal gavman i bin nominetim Pauline Masena long makim ol meri insait long asembli.

Mis Masena i bin pinisim skul bilong em long Okapa Haiskul we

em i pinisim gret 10 long 1981. Na stat long Januери inap long mun Jun long 1982, em i tren long wok seketeri long Lae Sekreterial koles. Tasol em i bin i gat bikpela sik tru na i go bek na stap long ples bilong em.

Taim em i stap nating long ples, em i mekim sampela wok welfea wantaim ol meri long Dorcus Wimens Klap bilong SDA Misin. Em i mekim dispela wok i kam inap long taim ol provinsal memba i vot long em olsem wimens representativ.

Mis Masena i tok tu olsem em i tingting long statim spesel skul bilong ol gret 6, 8 na 9 skul liva bilong ol meri. Em i tok, "Dispela skul bai kamapim ol meri husat bai kamap olsem mama bilong dispela provins. "Dispela em bai wanpela Hom Ekonomik skul."

Em i tok, sapos Primia i mekim senis long ol provinsal Minista, em i ting olsem bai i gat wanpela Ministri bilong em yet. Tasol em i no bin tokaut long wanem Ministri em i laikim.

Mis Masena i kisim pinis toktok olsem ol meri i no laikim em long mekim dispela wok. Dispela ol toktok kros i kam long planti meri husat i save long wok bilong ol meri na politik tu inap planti yia.

Wanpela bilong ol dispela meri em Mis Angela Soso, husat i kisim lip inap 3 mun long sanap long Provinsal Ileksen long Gahuku eria. Tasol em

i bin lus. Mis Soso em i metron bilong bikpela haus sik long Goroka. Na tu em i presiden bilong Isten Hailans Provinsal kaunsil ov Wimen. Em i no amamas tru long win bilong Mis Masena.

Mis Soso i tok, "Ol i laikim yes, yes meri tasol. Dispela i givim klia aidia tru olsem ol memba i no tingting long developmen bilong ol meri insait long provins."

Misis Ruth Paliau Rokam, husat i seketeri bilong Nesenel Kaunsil ov Wimen bilong PNG na wanpela strongpela meri i save mekim wok bilong ol meri inap longpela taim insait long Isten Hailans, i belhat tru long ol memba bilong provinsal gavman.

Em i tok, Mipela i laikim meri i gat gutpela save tru long olgeta kain wok i save kamap insait long provins i kisim dispela wok."

Olgeta dispela meri, Misis Anakapu, Misis Rokam na Mis Soso wantaim ol arapela meri i putim toktok pinis olsem ol i givim taim long Mis Masena long wanem kain wok bai em i wokim.

"Ol i tok, "Sapos em i no mekim gut wok long we mipela i ting, bai mipela i protes na putim mosen bilong no gat bilip long em long mekim dispela kain wok. Mipela i wet i stap tasol nau na lukluk long em."

Nau long dispela taim Mis Masena, i tok, "Ol toktok kros i kam long ol meri i putim mi moa i go antap long wok na nem bilong mi. Mi no wari long ol dispela toktok.



Mis Pauline Masena i makim ol meri insait long Isten Hailans Provinsal Gavman.

Mi winim tu ol bikpela meri i gat moa save ong wok politik na wok bilong ol meri na mi amamas long dispela. "Wanem kain moa toktok ol i mekim long mi bai promotim mi moa yet. Na dispela wok i bilong mi nau na mi gat rait long kisim wok olsem."

Ol 29 memba olgeta bilong provinsal asembli i bin vot long Mis Masena long 17 Desemba long makim ol meri insait long Isten Hailans Provinsal Asembli.

Nau long dispela taim yet Mis Angela Soso, Metron bilong bikpela haus sik long Goroka husat i wanpela pablik sevan, i bin kisim 3 mun lip long i go kempain long provinsal ileksen. Na bai em i go bek gen long wok long Nu Yia.

Em i tok, "Helt Dipatmen Het Kwata long Mosbi i askim mi long i go bek long wok na stretim up wanem kain hevi nau ol nes i gat. I gat planti komplek long metron i kisim ples bilong mi long wanem ol i ting

meri ya i no klia tumas long wok olsem metron."

Mis Soso husat i bin laik aplai long kisim wok olsem Eksekutiv Opisa bilong Nesenel Kaunsil ov Wimen. Kaunsil i wok long putimaut notis long dispela wok long niuspepa long wanem ol meri i gat save bilong wok long aplai.

Na Neseel Kaunsil ov Wimens (NCW) nau i kisim nem bilong wanpela Pilipino, 2-pela Australia na 5-pela PNG meri. Na long ol dispela PNG meri wanpela em Misis Nelly Lawrence husat i bin wok long seksen bilong polisi na plening wantaim olpela Praim Minista, Sir Julius Chan. Nau em i wok wantaim Pipels Progres Pati.

Ol bikmeri bilong Kaunsil bai kibung long Wewak long Februeri 1983 long makim wanem meri bai kisim wok bilong eksekutiv opisa. Wan yia olgeta no gat meri i mekim dispela wok na NCW i bruk daun nabaut.



(L-R) Daga Anakapu, Angela Soso na Ruth Rokam. Ol i no amamas long meri em provinsal gavman i makim.

PNG Sambai Long Intanesenel Yut Yia 1985

MINISTA bilong Yut, Meri, Lotu na Rekriesen, Mista Tom Awasa bai givim wanpela pepa i go long Nesenel Eksekutiv Kaunsil long neks yia, 1983. Dispela hap pepa bai gat lista bilong ol samting PNG i wokim long makim Intanesenel Yut Yia long 1985.

Mista Awasa i tok, "Mi wok klostu wantaim PNG Nesenel Yut Kaunsil na painimaut ol gutpela liklik rot PNG i ken wokim long makim dispela Yut Yia na bihainim ol tingting Yunaitet

Nesen i laikim. Ol dispela rot em, "bung wantaim na wok, developmen na gutpela sindaun."

Em i tok olsem ol wok o kain kain pilai bilong makim dispela Yut Yia i mas kamap nau i go inap long yia, 1985. Em bai yumi ken lukluk gen long ol dispela wok na program bilong yia, 1985 stret na amamas long ol samting yumi mekim.

Nesenel Yut Kaunsil bilong PNG bai go pas long ol wok. Dispela Kaunsil i bin tok save pinis long Mista Awasa long makim wanpela Nesenel Komiti i gat sampela

memba bilong Nesenel Yut Kaunsil, Provinsal Yut Kaunsil, sampela man long Gavman na ol narapela grup i save mekim ol samting long helpim ol yut insait long PNG.

Long dispela as tasol, Papua Niugini i mas traim long strongim wok bilong yut na developmen wantaim ol liklik kantri insait long Pasifik. Insait long yut program bilong Saut Pasifik Komisin i gat kain kibung ol i kolim 'Yut Link. Narapela bikpela oganaisesen PEACE-SAT i save helpim Yut Link na holim miting olgeta taim. ol i miting na toktok long planti samting i sut stret long Intanesenel Yut Yia.

Papua Niugini i ting

Saut Pasifik Foram i wanpela bikpela grup husat i ken bung wantaim na toktok long wok bilong ol yut i kamap long wan wan kantri. Em bai ol i ken bungim tingting na traim long mekim sampela wok na kamapim gutpela pren namel long ol Pasifik kantri.

Insait long PNG, Nesenel Yut Kaunsil i givimaut wanpela hap pepa i go long ol Provinsal Yut Kaunsil. Ol dispela Provinsal Yut Kaunsil i mas bungim tingting na mekim sampela wok Yunaitet Nesen Komiti i laik putim kamap long makim Intanesenel Yut Yia.

Narapela samting tu em Nesenel Yut Kaun-

sil i tok save pinis long Mista Awasa long makim wanpela de long Me, 1983 olsem Nesenel Yut Wik

bilong PNG.

Em bai ol yangpela manmeri i ken bung wantaim long Nesenel Yut Wik long 1983,

1984 na 1985 na toktok long ol asua i kamap namel long wok bilong ol insait long wan wan provins.

SINGER

PREN BILONG YU INAP OL TAIM



laip bilong Jisas

Tok Hait I Kam Long God

Luk 1:23-55



KWIKTAIM SEKARAITA I RAITIM ANSA NA ILISABET I KISIM NA RITIM.

TAIM MI BETEN LONG RUM HOLI, WANPELA ENSEL I KAM SANAP NA EM I TOK BAI MITUPELA I KISIM PIKININI MAN NA GIVIM NEM JON LONG EN. EM BAI I REDIM OL MANMERI BILONG YUMI LONG BIKPELA I KAM.



TASOL BILONG WANEM YU RAIT TASOL NA YU NO TOKSAVE LONG MI LONG MAUS?

SEKARAITA I RAIT GEN NA MERI I KISIM NA RITIM.

PASTAIM MI NO LAIK BILIPIM TOK BILONG ENSEL NA EM I TOK BAI MAUS BILONG MI I MAS PAS INAP LONG TAIM DISPELA OLGETA SAMTING I KAMAP PINIS.



SEKARAITA NA ILISABET I TINGTING PLANTI NA I PRET LIKLIK, TASOL TUPELA I AMAMAS LONG GOD I LAIK GIVIM DISPELA BIKPELA WOK LONG TUPELA. BIHAIN ILISABET I GAT BEL NA EM I TOK, "BIKPELA I MARIMARI LONG MI." NA TUPELA I WOK LONG TINGIM OL PROMIS GOD I BIN GIVIM LONG MAUS BILONG OL PROFET.



TAIM LAPUN PRIS NA MERI BILONG EN I WETIM PIKININI, LONG DISPELA TAIM YET, ENSEL GEBRIEL I KAM SANAP TOKTOK WANTAIM WANBLUT BILONG ILISABET, EM MARIA, OL MAKIM BILONG MARITIM KAMDA JOSEP BILONG NASARET.

MI WOKMERI BILONG BIKPELA. EM I KEN MEKIM OLSEM YU TOK.

Zia Nu Testamen

LONG Krismas de 25 Desemba, 1982, ol pipel bilong Zia long Morobe Provins i bin i gat bikpela amamas tru. Long wanem, long dispela de, ol i kisim nupela buk bilong Nu Testamen em ol i raitim long tokples bilong ol stret.

Stori na piksa - Kirk Franklin

Ol pipel bilong Zia i kisim dispela nupela Nu Testamen buk long Bauviles, em i stap 15 kilomita longwe long Morobe Patrol Pos. Moa long 500 manmeri i bung long dispela seremoni. Na bihain ol i bung na hatim singsing inap sampela awa.

Dispela Zia Nu Testamen i gat rait long tokples Zia, na Phanuel Oida, bilong Papua Niugini Baibel Translesen (BTA), i bin wok hat long tanim tok Inglis i go long tokples bilong ol Zia pipel bilong Morobe.

Phanuel Oida i bin statim wok bilong tanim tok long yia 1975. Pastaim long mekim dispela wok,

em i bin go stadi long Summer Institut ov Linguistiks (SIL) long tanim tok. Darryl Wilson, bilong SIL i bin helpim em long mekim las sekap long ol tokples i stap long dispela Nu Testamen bilong ol pipel bilong Zia.

Phanuel Oida em i namba wan PNG man long ol arapela 17 BTA, long tanim ol toktok, long kamapim wanpela Nu Testamen long tokples bilong wanpela lain manmeri long PNG.

Dispela Nu Testamen long tokples Zia em i makim bikpela amamas na hatwok bilong BTA. BTA i stat wok long yia 1977, olsem wanpela grup bilong PNG. Na i wok klostu wantaim SIL long tanim ol tok i go long tokples bilong ol manmeri long PNG.

I gat 1,400 buk bilong Nu Testamen long tokples Zia em ol i primum piwis. Na ol i wok long salim ol dispela Baibel i go long 3,000 manmeri bilong Zia insait long 13 viles long Morobe Provins. Sampela bilong ol dispela buk bai ol i salim tu long ol stua bilong salim ol buk long Lae.



Phanuel Oida i holim wanpela Nu Testamen buk long tokples Zia.

Sande letu

Frank Minale

NAMBA TRI SANDE BILONG YIA

(1 KORIN 12: 12-30) (23 JANUERI 1983)

Tude yumi tingting long namba wan pes Sen Pol i raitim i go long ol Korint, sapta 12, lain 12 i go inap long 30.

Long stori bilong tude Sen Pol i wokim wanpela tok piksa. Em i stori long sios bilong Krai hia long graun. Em i laik soim, yumi wan wan i gat wok insait long dispela sios, olsem han na lek na ai na maus.

Sen Pol tokkita tru oisem: "YUPELA i bodi bilong Krai." Yes, Tude. Nau. Hia.

Jisas i go bek pinis long heven..... wantaim bodi tru bilong em.... Olsem na sapos Krai i laik mekim wanpela wok hia long graun tude, wanpela man o meri i mas helpim em. Sapos Krai i laik skulim wanpela manki, orait, em i mas painim wanpela tisa long mekim. Sapos Krai i laik oraitim sikman, em i mas painim dokta o nes.... Na yumi yet i dispela tisa o dokta o nes.... o wokman o mama o fama. Em i bikpela ona i go long yumi wan wan..... yumi makim Krai long graun tude..... yumi kisim ples bilong em....

Nau mi laik wokim wanpela eksampel.... Long olgeta muvi i gat wanpela man o wanpela meri i kisim namba wan ples bilong stori.... Yumi kolim dispela man o meri "sta" bilong dispela muvi. Sampela taim dispela sta i no gat save o strong bilong mekim wanpela samting long stori bilong muvi. Ating em i mas flaim wanpela balus, o pundaun long hos, o kapsaitim wanpela ka. Tasol man o meri ya i no inap. Na tu, nogut em i bagarap na muvi i bagarap.

Olsem na muvi kampani i gat sampela spesel man na meri i save sambai long mekim ol dispela kain hatwok.... Man o meri ya i kisim ples bilong sta, em yumi kolim "dabol" bilong sta. Dabol i mas pasim wankain klos. Sapos dabol i go insait long stori bilong muvi na i kisim ples bilong sta, em no ken save. Long

wanem, em i dabol. Em i luk wankain tru olsem sta.

Orait, i wankain tru long laip bilong yumi. Jisas i go pinis long heven. Em i no moa stap long graun wantaim bodi bilong em. Tasol, olsem mipela i bin tok bipo, em i gat kain kain wok bilong mekim hia long graun. Em yet i no inap.

Olsem na yumi wan wan i hap long olsem olsem dabol bilong Jisas hia long graun tude. Olsem Sen Pol i rait long ol Korint: yumi wan wan i olsem wan wan hap bilong bodi bilong Krai long graun tude....

Bikos yumi wan wan i hap bilong bodi bilong Krai, yumi mas wok gut wantaim. Long bodi bilong yumi i olsem tasol. Sapos wanpela hap i no mekim wok bilong em, bodi i gat sik.

Na yumi no ken hambak long wok bilong yumi, na lap long wok bilong narapela man o meri. Long bodi i no gat wanpela wok i winim narapela. Nogat. Wok bilong pulimapim kaikai long maus, em i bikpela wok. Tasol wok bilong rausim pekpek, em tu i bikpela wok. Sapos bodi i no mekim - bai yu sik na yu inap dai.

Olsem tu yumi mas rispektim wok bilong narapela man o meri. I olsem tasol long bodi bilong yumi. Ai i amamas long han, na han i amamas long lek.... na i go olsem.

Na bodi i soim wanpela samting moa long yumi: yumi mas helpim man o meri i gat sik o bagarap. Sapos skin bilong yumi i hat, lek bilong yumi lusim strong - yumi laik slip tasol. Yumi no inap wok. Bodi i no laik yumi wok, yumi mas stretim sik pastaim. Olsem na em yet i slipim yumi na i tekewe strong long lek.

Yesa, dispela tok piksa bilong ol hap bilong bodi em i gutpela skul bilong laip bilong yumi. Yumi olgeta i memba bilong Krai, i memba bilong Sios.

Dok I Stilim Paia Bilong

Masalai

LONG bipo bipo tru i no gat paia na ol manmeri i save draim kaikai bilong ol tasol long san na kaikai. I gat wanpela ailan we i gat paia long en. Tasol, ol manmeri bilong dispela ples i save pret long wanpela lapun masalai meri husat i save bosim dispela ailan. Olsem na ol manmeri i save pret long go kisim paia long dispela ailan.

bikman ya em i no meri, em i winim olgeta samting. Em i kwint stret. Olsem na long nait long hausboi olgeta man i no slip liklik. Nogat. Ol i wok long stori yet long maritim dispela meri.

Long moning taim tru tulait i no bruk yet wanpela lapun man wantaim dok bilong em i go lukim bikman bilong ples na i tokim em, "Mitupela i laik traim dispela resis long kisim paia." Tasol bikman bilong ples i tokim lapun olsem, "Yu lapun tumas, maski yu go bek na stap." Tasol lapun ya i strong moa long go olsem na bikman bilong ples i tokim em, "Yu strong tumas. Em i orait, yu ken traim na sapos yu lus bai olsem wanem?" Lapun i tok, "Em i orait, sapos mi lus masalai meri i ken kaikai mi. Tasol bai mi salim dok bilong mi i kam bek na taim yu lukim, em bai yu save mi dai pinis."

Ol i toktok pinis na klostu san i laik kam antap, lapun wantaim dok bilong em i lusim ples na i go kamap long si taim san i stap antap pinis. Yupela save olsem long bipo tru ol dok i save harim

wanem samting ol man i save tokim ol. Olsem na lapun ya i tokim dok bilong em, "Yu mas hait klostu long paia na was long win. Nogut win i karim smel bilong yu i go na bai masalai meri i smelim na bai i kam kilim yu. Na sapos win i kam olsem long pas lain bilong yu, yu mas go long sait bilong win, em bai masalai meri i no ken smelim yu.

"Yu mas was gut tru. Sapos lapun masalai meri i kirap i go insait long haus bilong em orait, yu mas ran spit i go na pulim hap paia long maus bilong yu na ranawe i kam." Taim dok i harim pinis em i stat long swim solwara i go inap papa bilong em i no lukim em moa. Lapun papa i wet long dok inap tupela de pinis na em i ting ating lapun masalai meri i kaikai dok bilong em pinis, o ating ol bikipela pis i daunim em.

Tasol long namba tri de long moning taim san i sut i kam antap, lapun man ya i lukim wanpela blakpela samting i kam longwe yet na em i amamas liklik. Em i lukluk yet na em i lukim dok bilong em i kam klostu pinis wantaim hap paia i stap long maus bilong em. Em i amamas tru na i wokabaut i go long rip na holim pasim dok

bilong em long wanpela han na kisim paia long narapela han na i karim tupela i kam long nambis.

Klostu tru paia i laik dai tasol papa bilong dok ya i wokim hariap bikipela paia na i kukim sampela kaikai na taim tupela i kaikai, man, kaikai i swit moa. Tupela i amamas tru. Na long moning taim tru tupela i lusim nabis na i go long ples.

Taim ol i kamap long ples tupela i go stret long haus bilong Kukurai ya na i kirapim em. Em i kirapim lukim na i amamas tru. Em i paitim garamut na i singautim olgeta manmeri long kam lukim paia. Taim ol i kam lukim man ol i kirap nogut tru na amamas tu. Kukurai i tilim ol manmeri. Na ol meri i go long gaden na painim ol kaikai wantaim paiawut. Na ol man i go long bus na kilim planti abus. Na em i makim sampela yangpela manki long apinim ol hap hap paia wut na wokim paia i stap.

Long apinun dispela ples i pulap long ol pipel na ol meri na man i redim bikipela kaikai. Ol i singsing na olgeta manmeri i wokim bikipela paia na singsing raunim paia i go inap tulait.



Long moning taim tru bikman bilong ples i laik givim pikinini meri bilong em long lapun man ya. Tasol lapun man ya i tok, "Mi lapun tumas long maritim olsem na maski yu ken givim pikinini bilong yu long ol

narapela yangpela man." Olsem na lapun man ya i stap tasol wantaim bikman bilong ples. Bikman i lukautim em i stap wantaim dok bilong em.

Olsem na sapos yu lukim wanem dok i slip

arere long paia yu no ken raunim em. Long wanem em ol dok yet i kisim paia i kam.

**John Damge,
Brandi High School
Wewak.**




Wanpela de Kukurai bilong dispela ples i putim tok long olgeta man na i tok, "sapos wanem man tru i kisim dispela paia long ailan masalai bai dispela man i maritim pikinini meri bilong mi." Bikman bilong ples i tok olsem na bel bilong olgeta man i sut nogut tru. Long wanem pikinini meri bilong

pose! pes pose! p

**ANSA
BILONG
LAS WIK**



QUALITY KING SIZE CAMBRIDGE



Make yours a Cambridge today

Wantok Spot

Namba 90 - 8 Janueri, 1983.

Vanimo Volibal Skoa

DISPELA em i skoa bilong namba wan raun bilong Vanimo Volibal pilai em i bin kamap long Vanimo long pinis bilong wik long Sande 19 Desemba.

Arnold Ake

Namba wan pilai i stap namel long Guria 1 na Woromo 1. Ol i bin pilai smat tru i go na tupela tim wantaim i bin gat wan set. Orait, long painal, Waromo 1 i kamap strong liklik na autim Guria 1. Olsem na Waromo 1 i gat tu set na Guria 1 wan set tasol.

Namba tu pilai, Yako 2 na Waromo 1 i bin pilai. Yako 2 i strong liklik na paiaim ol Waromo 1, long tu set na Waromo 1 nil.

Namba tri pilai i kamap namel long ol Yako 1 na Yako 2. I luk olsem ol Yako 2 i strong liklik na olsem tasol ol i autim Yako 1 long wan set na Yako 2 tu set.

Namba 4 pilai i stap namel long Waromo 2 na Niugini Ailan, (NGI). Ol NGI i pilai gut tru na tu ol i gat gutpela spaika olsem Chris na gutpela fida bilong ol em Peter Kanawi husat i save givim ol strongpela hitbal, we ol Waromo 2 i kisim taim long painim bal. Olsem tasol ol NGI i autim Waromo 2. NGI i gat tu set na Waromo 2 i gat wan set tasol.

Namba 5 pilai i stap namel long Tyrent na Yako 2. Yako 2 i holim rekot yet na olsem isi tasol ol i autim Tyrent long Yako tu set na Tyrent nil.

Namba 6 pilai i stap namel long Guria 1 na Guria 2. Guria 2 ating i strong liklik olsem na ol i autim tiket bilong Guria 1, long tu set. Guria 1 wan set tasol. Long wanem, Guria 2 i gat gutpela spika olsem Simon Mledu na Alois Suapla. Tupela i bes spika tru long ol tim i kamap.

Narapela pilai gen i kamap namel long Waromo 2 na Tyrent. Waromo 2 i autim Tyrent isi tasol long tu set na Tyrent nil.

Namba 8 pilai i stap namel long Difens na NGI. Ol NGI i strong liklik na autim ol Difens. NGI i gat tu set na Difens nil.

Namba 9 pilai i stap namel long Waromo 1 na Elkom. Tasol Elkom i no bin kamap i winim gem long fofit.

Namba 10 pilai i bin go long Waromo 2 na

Plis. Plis tu i no bin kamap na Waromo 2 i bin winim dispela gem long fofit tu.

Narapela pilai em ol i win long fofit gen em pilai namel long Yako 1 na Plis. Dispela gem tu ol Plis i no bin redi na Yako 1 i fofitim.

Ol bes pilai bilong dispela wik. Guria 1, Alois Tau na Baltasar ol spaika na Timothy Jun, fida. Guria 2, Simon Mledu na Alois Suapla ol spaika na Benedict Seni em fida.

Yako 1, Aron em spaika na Abraham Siloko, fida. Yako 2, Baltasar Poma spaika na Boni Kaiyo em fida.

NGI, Chris, bes spaika na Peter Kanawi fida. Tyrent, Bobby Uri, spaika na Titus Nonori, fida. Waromo 1, Christopher Wonti, spika na fida em Cletus John. Elcom, Simon spaika na Gabriel

Kama fida. Luteran Yut, Kevin Kevenku, spaika na Lazarus Jun em bes fida. Christen Brothers, Tom em gutpela spaika bilong ol.

Plis, Augustin Benki em spaika. Naju, Sien Wunip em spaika na Alphonse Wesley em fida. Sandaun, John Kocex em fida na Kibson em spaika.

Na long pilai bilong ol meri, namba wan pilai i kamap namel long Nalu na Yako. Nalu i gat tu set na Yako wan set tasol, Nalu i win.

Bihain long dispela gem, Kalibobo na Waromo i pilai. Waromo i mekim i dai lait bilong Kalibobo long tu set na Kalibobo i nil.

Na long las gem, Edekesen i winim ol Plis long fofit.



Hailans Jon i winim gen ol arapela jon long pilai ragbi lig long PNG



PNG U11 soka tim i bin wltwltim gut ol tim bilong PNG bilong Not Kwinlan, Australia long taim ol i bin go pilai wantaim ol.

Kapore Soka



Ol pilai bilong olgeta wel pam setelmen i save kam bung na pilai wantaim long Kapore setelmen, long Wes Nu Briten.

SOFTBAL DRO

OL MAN

9 Janueri, 1983

TAIM TIM REPERI

A GRET — GRAUN 1

9.00	Dela Sale	V	Kerevat	M. Kalas
10.30	M. Karps	V	Malangan	H. Hara
12.00	Elcom	V	Chebu	P. Mesak
1.30	YMCA	V	Kabiu	M. Nialir
3.00	Agogol	V	Demons	J. Pupua
4.30	Gasel	V	B. Igels	L. Rumery

A RESEV — GRAUN 3

9.00	A. Utd	V	NAES	S. Betsc
10.30	B. Igels	V	Yomba	G. Mada
12.00	Sankaro	V	Fuji	N. Tata
1.30	Malangan	V	Gasel	L. Paivu
3.00	NGI	V	Hansabe	A. Girana
4.30	Elcom	V	Yokomo	D. Martin

B GRET — GRAUN 2

9.00	Togelu	V	Karanas	W. Daniel
10.30	Agogol	V	Sankaro	R. Rolly
12.00	Kabiu	V	Karanas	C. Hopkins
1.30	NGI	V	Demons	J. Kaptiga
3.00	M. Karps	V	Chebu	J. Tetag

C GRET — GRAUN 4

9.00	Malangan	V	Yomba	T. Apana
10.30	Kapentas	V	Demons	G. Kome
12.00	Yokomo	V	Kerevat	N. Udur
1.30	Chebu	V	Adkol	M. Tigila
3.00	Fuji	V	YMCA	N. Simbai
4.30	Hansabe	V	Kabiu	N. Pasip

GRAUN 5

9.00	Aviat	V	Kabiu	J. Bae
------	-------	---	-------	--------




Prins Lloni bilong lain Llongo wanpisin i les long maritim Prinses Wamba bilong Wambesi, long wanem meri i pat tumas. Tasol Pantom yet i mekim kain puripuri bilong em na Prinses Wambi i lusim skin na kamap naispela meri tru. Tasol Prinses Wamba i les long maritim Prins Lloni gen na i maritim narapela man.

Ritim dispela komik nau na painimaut wanem kain puripuri Pantom i bin yusim. Na painimaut long wanem man Prinses Wamba i maritim gen. Gutpela stori, ya pren. Baim dispela komik hariap.

NO 750

1982 Spot Stori



Dispela em i las pait bilong John Aba. Em i bin pait wantaim Gerry Williams bilong Australia. Bihain long dispela pait John i kisim sik. Na em i hangamapim glap bilong em.



Australia i bin winim Osienia Kap long pilai soka ol i bin holim long Mosbi.



Lae i autim Mosbi long soka 2-1 long Mosbi.



Junia Kiwi tim bilong Nu Silan i bin autim PNG long taim ol i bin kam pilai ragbi lig wantaim tim bilong PNG.



Spem Jun 11 - Ol pilaia bilong Itali tim i amamas na karim Wol Kap ol i bin winim long taim ol i autim Wes Jamani 3-1 long gren painal bilong Wol Kap Soka.


BIM
BOROKO
MOTORS

NISSAN SUNNY

NISSAN

GUTPELAI!

Spit
Draiv
Iukluk
Komputarais
Seket
Katim Kona Gut



MOAI!

Samting bilong
sevim laip
Rum bilong het
Rum bilong lek
Spes bilong
Kago
Spes long
windua
Nambawan
stall ka

“NAMBAWAN HATCHBACK BILONG 80
LONG PRAIS YU INAP LONG BAIM!”



Boroko Motors
Boroko Motors
Boroko Motors
Boroko Motors
Boroko Motors

Port Moresby
Lae
Rabaul
Madang
Mt Hagen

25 5255
42 1144
92 2777
82 2433
52 1433

Arawa Motors Pty Ltd
Higaturu Motors Pty Ltd
Farmset Ltd
Provincial Agencies Pty Ltd
Spitk Gen Engineers Pty Ltd

Arawa
Popondetta
Goroka
Kavieng
Mewak

95 1566
29 7175
72 1375
94 2131
06 2029

Lora Motors Pty Ltd
Milne Bay Enterprises

Manemanda
Alofau

5/ 4059
61 1242







SIKAGO, NU YOK, 23 DESEMBA - Jim Chikaraiski wantaim meri bilong em Amy na Erin wanpela pikinini meri tupela i bin lukautim (sindaun antap long lek bilong papa). Ol i redi tasol long amamasim namoa wan krismas bilong ol wantaim 5-pela nupela pikinini mama i bin karim long Ogas 4 1982. Long lephan i go inap long rait han em, Kristi, Jami, Jared, Kari na Juli. Dok bilong ol "Charlie" i sindaun wantaim ol



NU YOK, AMERIKA, 23 DESEMBA - Ol wokman bilong embulens i wok long givim marasin long wanpela man husat i kisim bagarap insait long Golden Sta Kaikai long Sainataun. Ol plisman tu i helpim long karim narapela man i go ausait. Foapela memba bilong wanpela grup ol i kolim "Flying Dragons" i bin pait wantaim narapela lain birua grup long dispela hap. Bihain long dispela pait ol plis i bin painim olsem tupela man i dai na narapela 9-pela man i kisim liklik bagarap long bodi bilong ol tasol.



WASINGTON, AMERIKA, 21 DESEMBA - Presiden Reagan bilong Amerika (lephan) i kibung wantaim King Hussein bilong Jordan long Oval Opis insait long Wait Haus long Tunde, Desemba 21, 1982. Presiden Reagan i laikim King Hussein i toktok klia long ol samting i kamap long Midel Is eria.



MOSKO, RASIA, 21 DESEMBA - Dispela em i bikpela kibung bilong CPSU Cc, em USSR Sprim Soviet na Sprim Soviet bilong Rasia Federesen. Ol i kibung insait long Kremlin, em bikpela haus kibung bilong gavman, long makim namba 60 yia kantri bilong ol i bin bung wantaim. Planti lida bilong Rasia wantaim Jeneral Seketeri bilong CPSU CC, Yuri Andropov na bikman bilong ol arapela kantri i bin kamap long dispela kibung.



TUAS, FRANS, 23 DESEMBA - Pere Noel i karim Krismas presen bilong ol pikinini na raun wantaim long dispela liklik kanu. Bikpela ren i bin pundaun na wara i karamapim olgeta ples klostu long Tuas. (Pere Noel em i Santa Klaus o Fada Krismas tasol). Em i raun na i wok long givim presen i go long ol pikinini insait long olgeta ples.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.